

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI RABU : 27 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MUSLIMIN BIN YAHAYA
[SUNGAI BESAR]**

TARIKH : 27.11.2019 (RABU)

SOALAN NO. 1

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan berkaitan Program Food Bank Siswa. Setakat
mana kejayaan program ini dan berapa siswa yang telah dibantu.

JAWAPAN

Yang di-Pertua,

Program Food Bank Siswa (PFBS) adalah satu inisiatif kesinambungan daripada Program Food Bank Malaysia yang telah dilancarkan pada 22 Disember 2018 . Sehingga kini, Program Food Bank Malaysia ini telah di perluaskan ke peringkat Institut Pengajian Tinggi Awam bagi membantu golongan mahasiswa dari keluarga golongan B40 supaya mereka dapat memberi tumpuan yang lebih baik terhadap pembelajaran. PFBS ini adalah salah satu inisiatif yang terhasil daripada Majlis Tindakan Kos Sara Hidup Negara (NACCOL) yang dipengerusikan oleh YAB Timbalan Perdana Menteri pada 15 Februari 2019.

PFBS ini adalah hasil kerjasama antara penyumbang dan pihak universiti dan ianya dilaksanakan melalui dua konsep iaitu *food pantry* dan *central kitchen*. *Food pantry* adalah penyimpanan barang makanan kering di satu bilik yang sesuai dan diuruskan oleh Persatuan Pelajar yang ditugaskan. Pelajar yang layak menerima bantuan PFBS ini boleh mengambil makanan yang akan diagihkan mengikut jadual yang ditetapkan. Manakala *Central Kitchen* adalah sumbangan makanan yang boleh dimasak seperti sayur-sayuran dan buah-buahan akan dimasak dan diberikan kepada pelajar yang layak menerima bantuan Food Bank Siswa.

Sehingga November 2019, program ini telah dilaksanakan di 21 buah Universiti Awam dan telah memberi manfaat kepada 6,870 pelajar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK AARON AGO DAGANG [KANOWIT]

TARIKH : 27 NOVEMBER 2019 (RABU)

SOALAN

Minta **MENTERI PENDIDIKAN** menyatakan jumlah universiti dan pelajar di Malaysia pada tahun 2019 (public & private universities) dan ranking universiti-universiti ini di peringkat global mengikut "*Global Higher Education Ranking System*).

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini terdapat 20 buah universiti awam (UA) dan sehingga 31 Disember 2018 terdapat 452 buah institusi pendidikan tinggi swasta (IPTS). Pada tahun 2018, bilangan enrolmen pelajar di UA adalah seramai 552,702 orang dan 576,982 orang pelajar di IPTS.

Berdasarkan laporan *QS World University Rankings 2020* yang dikeluarkan pada 19 Jun 2019, Universiti Malaya telah berjaya disenaraikan di antara 70 universiti terbaik di dunia berbanding di tempat ke-114 pada tahun 2018. Empat lagi UA juga berjaya menunjukkan peningkatan yang membanggakan, telah berjaya menempatkan dalam 100 universiti terbaik dunia berbanding tahun 2018. Sebagai contoh Universiti Putra Malaysia di kedudukan ke-159, Universiti Kebangsaan Malaysia di kedudukan ke-160, Universiti Sains Malaysia di kedudukan ke-165 dan Universiti Teknologi Malaysia di kedudukan ke-217.

Selain itu, IPTS yang disenaraikan dalam 'top 500' iaitu UCSI University dan Universiti Teknologi Petronas. Di dalam kedudukan 'top 1000' *QS World University Rankings*, terdapat 13 buah UA dan IPTS iaitu Taylor's University, Management and Science University, Universiti Utara Malaysia, Universiti Islam Antarabangsa Malaysia, Universiti Teknologi MARA, Universiti Malaysia Perlis, Sunway University, Universiti Malaysia Pahang, Multimedia University, Universiti Malaysia Sarawak, Universiti Tenaga Nasional, Universiti Tunku Abdul Rahman dan Universiti Malaysia Sabah.

Selain itu, untuk kedudukan Asia, berdasarkan QS University Ranking: Asia 2020 yang dikeluarkan pada hari ini iaitu 27 November 2019, kedudukan Universiti Malaya (UM) buat pertama kalinya dalam sejarah kita adalah di tangga pertama di Malaysia dan ke-13 di Asia, berbanding di tangga ke-24 pada tahun 2018.

Peningkatan ketara berlaku bagi UiTM iaitu pada kedudukan 158 pada tahun 2018, kita telah berjaya meningkatkan kepada 119 pada tahun 2020. Begitu juga bagi UMP telah menduduki di tangga ke 290 pada tahun 2018, telah meningkat ke tangga 134 pada tahun 2020. Ini semua adalah hasil daripada usaha pembaharuan holistik yang telah dilakukan semenjak tahun 2018.

Selain kedudukan universiti secara keseluruhan, Kementerian juga berpandangan bahawa kedudukan sesebuah universiti boleh juga dilihat berdasarkan pengkhususan subjek. Universiti Malaya misalnya berada pada kedudukan ke-15 dunia dalam bidang kejuruteraan atau *engineering* berdasarkan *U.S. News and World Report*. Kementerian sentiasa mengambil semua langkah yang perlu untuk meletakkan universiti awam dan universiti swasta di peta dunia. Pelbagai inisiatif telah dilakukan ke arah tujuan tersebut. Kebanyakan inisiatif ini dilakukan secara tidak konvensional dan secara radikal.

Antaranya ialah proses pengantarabangsaan. Kita mensasarkan lebih banyak kolaborasi dan kerjasama substantif antara universiti awam, universiti swasta dan juga universiti tersohor dunia. Saya sendiri telah mengambil inisiatif peribadi pergi ke universiti tersohor di dunia untuk memadankan mereka dengan university di Malaysia. Kita akui untuk

NO. SOALAN : 2

bersaing dengan universiti raksaksa ini mungkin mengambil masa yang panjang tetapi kita melakukan kolaborasi bersama-sama dengan mereka. 'If you cannot beat the giant, you be friend with them, so you be known as friend of the giant' dengan izin.

Walau apa pun, Kementerian ingin menekankan peranan universiti adalah untuk perkembangan holistik, mengembangkan cabang-cabang ilmu tradisional dan moden, penjana modal insan yang holistik dan cendekiawan, memacu pembangunan negara dan menyelesaikan masalah sebenar masyarakat serta mendidik masyarakat adalah lebih utama dan tidak boleh sama sekali dikesampingkan dalam usaha kita mengejar kedudukan universiti yang lebih baik.

Sekian, terima kasih.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK
SERI PANGLIMA HAJI MOHD DUN
[BEAUFORT]**

TARIKH : 27 NOVEMBER 2019 (RABU)

SOALAN

Datuk Hajah Azizah binti Datuk Seri Panglima Haji Mohd Dun [Beaufort] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah tindakan Kementerian dalam menangani isu kelekaan penggunaan gadget dalam kalangan kanak-kanak pada era ini.

JAWAPAN

Tuan Yang di-Pertua,

Ibu bapa zaman sekarang gemar 'mendidik' anak-anak mereka untuk menggunakan *gadget* sejak kecil sehingga mereka begitu leka bermain. *Gadget* yang dimaksudkan adalah telefon mudah alih, tablet dan iPad. Ini termasuk juga televisyen.

Memang tidak dapat dinafikan penggunaan *gadget* mempunyai banyak faedah terutama dalam urusan pembelajaran, komunikasi dan jual beli. Namun, teknologi juga memberi kesan negatif terutamanya kepada kanak-kanak jika disalahgunakan dan tanpa pengawasan orang tua.

Menurut laporan Tinjauan Kebangsaan Kesihatan dan Morbiditi (NHMS) tahun 2017, oleh Institut Kajian Umum (IKU) Kementerian Kesihatan Malaysia (KKM), sebanyak 50.1% pelajar sekolah menengah (13-17 tahun) menghabiskan masa lebih tiga jam untuk menonton TV, bermain permainan di komputer dan sebagainya. Tinjauan tersebut juga mendapati sebanyak 85.6% remaja adalah pengguna internet dan 29.0% dalam kalangan mereka telah ketagihan internet. Peralatan untuk mereka melayari internet adalah telefon pintar (94%), komputer (62%) dan peranti tablet (31%).

Manakala satu tinjauan pendapat yang dilakukan oleh LPPKN di Lembah Klang mendapati 78.3% ibu bapa membenarkan anak-anak memiliki *gadget*. Amat membimbangkan dengan sikap masyarakat yang kini dilihat begitu terikat dengan *gadget* dan peranti digital untuk memperoleh maklumat serta berkomunikasi, tanpa mengendahkan dunia fizikal di sekeliling mereka.

Tuan Yang di-Pertua,

Beberapa inisiatif telah diambil oleh pihak kementerian seperti:

- i) LPPKN telah menganjurkan majlis ilmu kekeluargaan sempena sambutan Bulan Keluarga Kebangsaan 2018 iaitu Forum Keibubapaan di Alam Siber dan bicara Santai Keluarga yang

SOALAN NO. 3

membincangkan beberapa topik penting seperti keselamatan siber, pengantunan kanak-kanak (*child grooming*) dan pornografi. Program ini telah diadakan pada 3 November 2018 di Pusat Keluarga LPPKN Seremban 2, Negeri Sembilan;

- ii) LPPKN turut menganjurkan Forum '*Digital Parenting and Child Online Protection*' dengan kerjasama UNICEF pada 20 Jun 2019. Topik berkaitan keselamatan kanak-kanak di alam siber, jenayah seksual kanak-kanak terus dibincang dalam Forum Keibubapaan Kreatif Mendepani Cabaran Alaf Baru pada 13 Julai 2019 (melibatkan 775 peserta) serta forum kekeluargaan yang diadakan LPPKN dengan kerjasama NGO pada 25 November bersempena Bulan Keluarga Kebangsaan tahun 2019; dan
- iii) Kementerian melalui Institut Sosial Malaysia (ISM) telah menganjurkan Seminar Keselamatan Kanak-Kanak "*Always Beware and Be Aware (ABBA)*" semenjak tahun 2015. Seminar ini dilaksanakan selaras dengan kehendak Konvensyen mengenai Hak Kanak-kanak (CRC), Dasar Kanak-kanak Negara (DKKN) dan Dasar Perlindungan Kanak-Kanak Negara iaitu setiap kanak-kanak mempunyai hak untuk membesar dalam persekitaran yang selamat. Seminar ini telah diadakan di Felda Residence, Sungai Klah, Perak, Dewan Seri Negeri, Ayer Keroh, Melaka dan Langkawi.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH SITI ZAILAH BINTI MOHD
YUSOFF [RANTAU PANJANG]**

TARIKH : 27 NOVEMBER 2019 (RABU)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan apakah justifikasi kelulusan Laporan Penilaian Kesan Kepada Alam Sekitar (EIA) diberikan terhadap projek *Penang South Reclamation* (PSR) sedangkan ianya mendapat bantahan banyak pihak yang risau akan impak kerosakan teruk ekosistem alam dan mata pencarian golongan nelayan.

JAWAPAN

Tuan Yang di-Pertua,

Untuk makluman Ahli Yang Berhormat,

Dimaklumkan bahawa setelah meneliti dan menyemak laporan tersebut Jabatan ini telah mendapati Laporan EIA yang dikemukakan telah memenuhi kehendak Seksyen 34A(3), Akta Kualiti Alam Sekeliling 1974. Dengan itu, dimaklumkan bahawa Laporan EIA ini diluluskan pada 25 Jun 2019 dengan 72 syarat-syarat kelulusan.

Laporan ini telah melalui prosedur pameran awam yang telah diadakan dari 29 April 2019 hingga 28 Mei 2019 di sebelas (11) lokasi iaitu di Perpustakaan Negara Malaysia, Perpustakaan Jabatan Alam Sekitar Malaysia, Perbadanan Perpustakaan Awam Negeri Pulau Pinang, Kompleks Pentadbiran Kerajaan Negeri Pulau Pinang, Balai Polis Teluk Kumbar, Pusat Perkhidmatan Setempat Nelayan (PPSN), Jabatan Alam Sekitar Pulau Pinang, Jabatan Alam Sekitar Cawangan Bayan Lepas, Majlis Perbandaran Seberang Perai, Penang Town Hall serta Pejabat Daerah dan Tanah Seberang Perai Selatan.

Satu mesyuarat EIA Teknikal Review Committee (EIATRC) bagi mengkaji dan membincangkan Laporan EIA bagi cadangan projek di atas diadakan sebanyak dua kali pada 10 Mei 2019 dan 29 Mei 2019 yang dihadiri oleh Setiausaha Kerajaan Negeri Pulau Pinang, agensi-agensi kerajaan di peringkat negeri dan persekutuan, *Appointed Individual* dan jururunding EIA.

Jabatan Alam Sekitar juga telah menarik perhatian pihak Kerajaan Negeri Pulau Pinang bahawa pembangunan projek akan menyebabkan kemusnahan kekal ke atas ekosistem dataran lumpur (*mudflat*), *fishing ground*, *kawasan pendaratan penyu*, *sebahagian terumbu karang di Pulau Rimau* yang merupakan ekosistem penting kepada sumber perikanan. Kemusnahan kekal ini akan memberi impak negatif yang signifikan kepada sumber perikanan, nelayan dan jaminan sumber bekalan makanan negara. Dalam hal ini pihak Kerajaan Negeri Pulau Pinang hendaklah memastikan semua langkah mitigasi yang

dicadangkan di dalam Laporan EIA dilaksanakan tanpa gagal dengan nasihat teknikal jabatan berkaitan terutama Jabatan Perikanan Malaysia dalam hal berikut:-

Melaksanakan *Offset Programme* sebagai sebahagian daripada *Penang OffSet Masterplan* antaranya merangkumi:-

- a. Mengadakan tukun tiruan;
- b. Memasang *Fish Aggregating Device* (FAD);
- c. Program penanaman semula bakau dengan nasihat Jabatan Perhutanan dan FRIM;
- d. Pelepasan benih ikan;
- e. Mengadakan struktur *eco-engineering* pada lapis lindung pantai; dan
- f. Menyediakan dana untuk kajian dan penyelidikan penyu dan terumbu karang

Kajian teknikal terperinci dan ulasan Jabatan teknikal berkaitan hendaklah dilaksanakan sebelum pelaksanaan *Offset programme* di atas;

- i. Menubuhkan Jawatankuasa Pelaksanaan *Offset Programme* dengan melibatkan agensi teknikal berkaitan bagi memantau pelaksanaan offset program yang dicadangkan di dalam Laporan EIA; dan
- ii. Memastikan *Offset Programme* ini dipantau secara berkala dan diaudit bagi memastikan keberkesanan pelaksanaannya. Laporan pemantauan *Offset programme* ini hendaklah dikemukakan kepada Jawatankuasa Pelaksanaan *OffSet Programme*.

Jabatan telah turut menarik perhatian pihak Kerajaan Negeri Pulau Pinang bahawa pembangunan ini juga akan mengakibatkan kehilangan "livelihood" kepada nelayan. Sehubungan itu pihak Kerajaan Negeri Pulau Pinang hendaklah :-

NO. SOALAN : 4

- i. Membentuk dan melaksanakan *fisherman taskforce* yang dipengerusikan oleh Exco Pertanian dan Industri Asas Tani bagi memastikan semua komitmen dan langkah kawalan yang dinyatakan di dalam laporan EIA dilaksanakan;
- ii. Menyediakan *exit plan* bagi komuniti nelayan dan ianya hendaklah dikaji, diperjelaskan dan mendapat persetujuan Jabatan Perancangan Bandar dan Desa (PLANMalaysia); dan
- iii. Menyediakan pusat perkhidmatan setempat nelayan (PPSM) sebagai One Stop Centre (Pusat Setempat) bagi menangani semua aduan berkaitan pelaksanaan projek terutamanya berkaitan fisherman *exit plan*.

Selain itu, Pihak Kerajaan Negeri Pulau Pinang hendaklah :-

- i. Melaksanakan *green river programme* seperti yang dinyatakan di dalam laporan EIA bagi meningkatkan kualiti air dan *flushing capacity*. Sungai-sungai terlibat adalah Sungai Bayan Lepas, Bayan Lepas *Main Drain*, Sungai Batu, Sungai Telok Kumbar, dan Sungai Gertak Sanggul;
- ii. Menjalankan pemantauan ke atas aspek hidraulik secara terperinci bagi penambakan ini perlu dijalankan pada setiap peringkat pembangunan dan dilaporkan kepada JAS serta Jabatan Pengairan dan Saliran Malaysia;
- iii. Melaksanakan *maintenance dredging* secara berkala seperti yang dinyatakan di dalam laporan EIA;
- iv. Memastikan laluan navigasi untuk nelayan diselenggara;
- v. Membina lapis lindung pantai dan menjalankan pemuliharaan pantai bagi kawasan yang dijangka terhakis akibat pelaksanaan projek ini;

NO. SOALAN : 4

- vi. Mengkaji lebih lanjut bagi cadangan mewujudkan kawasan perlindungan perikanan dengan nasihat Jabatan Perikanan;
- vii. Menjalankan kajian laluan migrasi udang hendaklah dijalankan dengan nasihat Jabatan Perikanan; dan
- viii. Membina jeti nelayan seperti yang dinyatakan di dalam Laporan EIA.

Bagi pembangunan atas tanah penambakan (*top side development*), Pemaju hendaklah mengemukakan Laporan EIA baru sekiranya tertakluk kepada Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015 dan hendaklah selaras dengan Rancangan Tempatan Daerah berkaitan.

Pihak Kerajaan Negeri Pulau Pinang hendaklah melaksanakan semua akujanji yang telah dinyatakan di dalam Laporan EIA. Jabatan Alam Sekitar akan sentiasa menjalankan pemantauan projek ini. JAS juga boleh mengeluarkan notis berhenti kerja (*stop work order*) sekiranya berlaku sebarang langgaran syarat EIA projek tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATIN PADUKA DR. TAN YEE KEW
(WANGSA MAJU)**

TARIKH : 27 NOVEMBER 2019

SOALAN

DATIN PADUKA DR. TAN YEE KEW [WANGSA MAJU] minta **MENTERI DALAM NEGERI** menyatakan adakah Kementerian bercadang supaya keputusan ujian DNA dapat digunakan sebagai bukti untuk mengenalpasti hubungan di Antara anak dengan bapa dalam permohonan kewarganegaraan.

JAWAPAN

Tuan Yang di-Pertua,

Untuk makluman Ahli Yang Berhormat, kewarganegaraan seseorang individu ditentukan berdasarkan kepada status perkahwinan dan taraf kewarganegaraan ibu bapa kandung sewaktu kelahiran. Justeru itu, kaedah perekodan taraf kewarganegaraan individu yang dilahirkan di Malaysia oleh Jabatan Pendaftaran Negara adalah selaras dengan peruntukan di bawah Bahagian 3 Perlembagaan Persekutuan (Citizenship Rule 1964) serta perundangan berkaitan yang berkuat kuasa dalam isu pendaftaran perkahwinan, kesahtarafan anak, peraturan imigresen dan lain-lain.

Buat masa ini, kerajaan hanya menggunakan keputusan DNA sebagai dokumen sokongan bagi mengesahkan pertalian darah seseorang dengan ahli keluarga yang lain khususnya di antara kanak-

SOALAN NO : 5

kanak dengan ibu atau bapa ataupun dengan adik-beradik yang lain dan tidak dijadikan sebagai bukti konklusif dalam penganugerahan kewarganegaraan Malaysia. Ini kerana setiap pemohon masih perlu mematuhi undang-undang lain, khususnya yang berkaitan dengan pendaftaran perkahwinan dan mempunyai status keberadaan yang sah di Persekutuan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI MAHDZIR BIN KHALID
[PADANG TERAP]**

TARIKH : 27 NOVEMBER 2019 (RABU)

SOALAN NO. 06

Minta **MENTERI PENDIDIKAN** justifikasi adakah faktor kekangan kewangan disebabkan kegagalan tadbir urus Kerajaan telah mengakibatkan pihak Kementerian bertindak menggadaikan kepakaran, misi dan visi yang berbeza di dalam memartabatkan bidang akademik sehingga terpaksa menggabungkan Universiti Sultan Zainal Abidin (UniSZA) dan Universiti Malaysia Terengganu (UMT) demi untuk menjimatkan kos.

JAWAPAN

Tuan Yang di-Pertua,

Penggabungan Universiti Sultan Zainal Abidin (UNISZA) dan Universiti Malaysia Terengganu (UMT) merupakan peluang untuk memperkasakan lagi kebitaraan bidang fokus kedua-dua buah universiti terutama dalam bidang sains kelautan dan peradaban islam. Berdasarkan kepada kebolehpayaan dan kepakaran kedua-dua universiti, Mesyuarat Jemaah Menteri pada 5 April 2019 telah bersetuju secara dasarnya dengan cadangan supaya Universiti Malaysia Terengganu (UMT) dan Universiti Sultan Zainal Abidin (UniSZA) digabungkan.

Perbincangan dengan pihak berkepentingan dan juga pemegang taruh telah memperlihatkan keupayaan dan potensi UMT dan UniSZA sebagai sebuah universiti baharu yang menjadi peneraju terulung dalam

integrasi keilmuan Islam dan sains terutamanya dalam bidang Ilmu Peradaban Islam dan Sains Kelautan. Rasionalisasi penggabungan UMT-UniSZA ialah:

1. Melonjakkan pencapaian dan kecemerlangan akademik, penyelidikan dan pengantarabangsaan;
2. Melipat ganda kapasiti, keberhasilan dan impak sumber manusia, kepakaran dan fasiliti universiti;
3. Perluasan akses dan kemudahan, fasiliti, infrastruktur kepada para pelajar dan kakitangan. Perluasan akses dan kemudahan ini akan mempertingkatkan kualiti pembangunan pelajar dari segi akademik dan sahsiah; dan

Saya ingin mengambil kesempatan ini untuk menjelaskan bahawa keputusan penggabungan ini tidak didorong oleh faktor kekangan kewangan di pihak Kerajaan. Ini boleh dilihat melalui peruntukan belanjawan mengurus untuk kedua-dua universiti menunjukkan trend peningkatan. Untuk tahun 2020, UniSZA bakal menerima RM173 juta berbanding RM147 juta bagi tahun 2019. UMT pula bakal menerima RM 165.5 juta pada tahun hadapan berbanding RM 161 juta bagi tahun 2019. Tuan yang di-Pertua,

Kementerian tentu sekali akan memastikan penggabungan ini tidak akan merugikan mana-mana pihak yang terlibat. Pendekatan radikal dan tidak konvensional merupakan strategi terbaik pihak KPM bagi mencapai hasrat mendepani realiti baharu pendidikan seperti mana yang telah disebutkan sebelum ini demi meletakkan universiti di Malaysia di peta dunia dan melahirkan menara gading yang penjana kepada lahirnya intelektual dan cendekiawan yang boleh memberi solusi bukan hanya kepada masalah masyarakat, bukan hanya kepada masalah negara tetapi menjadi warga dunia yang bertanggungjawab demi mewujudkan hadharah kemanusiaan yang baru.

Kementerian juga berdasarkan penjelasan saya tadi akan memastikan tidak timbul isu penggabungan yang bakal menggadaikan apa-apa kepakaran, visi dan tumpuan semasa bidang akademik kedua-

NO. SOALAN : 6

dua universiti yang terlibat, bahkan peluang penggabungan ini adalah satu lonjakan bagi memperkasakan lagi kebitaraan bidang fokus kedua-dua buah universiti, mempertingkatkan kualiti perkhidmatan serta memberi lebih nilai tambah kepada mahasiswa, fakulti serta komuniti setempat. Negeri Terengganu secara khusus dan sendiri akan turut mendapat limpahan manfaat melalui pemeraksanaan hub pendidikan di negeri itu yang bakal menjadi sebuah universiti antarabangsa dan menjadi hub ilmu serantau terutamanya kepada kawasan Indo-China dan jugak ASEAN.

Tekadkan, sepertimana yang telah disebutkan sebelum ini apabila digabungkan kedua-dua universiti ini, mereka akan mempunyai lebih ramai professor sebagai sebuah universiti, lebih banyak sitasi sebagai sebuah universiti, lebih banyak kebitaran sebagai sebuah universiti, yang lebih penting kita ingin mempertingkatkan *visibility* atau keberadaannya di peringkat global, diperingkat antarabangsa sebagai sebuah universiti maritim tetapi mempunyai dasar dan asas kepada keilmuan islam itu sendiri. Kami juga beriltizam untuk memastikan penggabungan ini akan meletakkan bukan hanya sekadar universiti yang baharu ini sahaja di peta global malah negeri Terengganu dan juga negara Malaysia nusa yang kita dicintai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 27 NOVEMBER 2019 (RABU)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan statistik terkini berkaitan laporan pencemaran alam sekitar yang berlaku mengikut negeri dan apakah pihak Kementerian ada merangka suatu "*Standard Operating Procedure (SOP)*" terhadap kesedaran dan siap siaga bagi penduduk setempat yang berisiko tinggi selaras di seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat,

Berdasarkan rekod di Jabatan Alam Sekitar pada tahun 2019 (Jan – 31 Oktober 2019), sebanyak 9681 laporan pencemaran alam sekitar diterima membabitkan pencemaran air, udara, tanah, buangan terjadual, bunyi bising, tumpahan minyak dan lain lain.

Pecahan mengikut negeri adalah seperti berikut:

Jenis Aduan Negeri	Udara	Air	Buangan Terjadual	Bunyi Bising/ gegaran	Tanah	Tumpahan Minyak	Lain- Lain	Jumlah
Selangor	2379	215	22	57	27	6	43	2749
Johor	1149	135	37	40	3	28	61	1453
Pulau Pinang	645	95	44	20	0	1	57	862
Kedah	602	56	8	13	3	6	32	720
W/P K. Lumpur	416	49	2	49	2	1	71	590
Perak	474	52	8	11	1	8	28	582
Negeri Sembilan	509	59	8	6	2	8	23	615
Melaka	369	24	9	6	0	6	9	423
Sabah	372	53	9	16	7	6	26	489
Sarawak	266	24	4	9	1	0	8	312
Pahang	240	38	8	2	8	3	7	306
Terengganu	209	13	4	2	1	2	10	241
Kelantan	225	20	0	2	0	0	11	258
Perlis	23	22	0	3	0	1	1	50
W/P Labuan	13	5	1	0	0	0	1	20
W/P Putrajaya	4	1	0	1	0	1	4	11
Jumlah	7895	861	164	237	55	77	392	9681

Dalam tempoh yang sama, JAS telah berjaya melaksanakan:

1. 11, 710 Pemeriksaan, peningkatan 63% dari tahun lepas;
2. 1,593 Arahan Lapangan, peningkatan 33% dari tahun lepas;
3. 3,413 Notis Arahan, peningkatan 70% dari tahun lepas;

4. 3.465 Kompaun, peningkatan 51% dari tahun lepas;
5. 238 Tindakan Makamah, peningkatan 37% dari tahun lepas;
6. 254 Perintah Larangan, peningkatan 4,133% dari tahun lepas;

Ahli-ahli Yang Berhormat,

Berkenaan "*Standard Operating Procedure (SOP)*", Kerajaan melalui Agensi Pengurusan Bencana Negara (*National Disaster Management Agency – NADMA*), Jabatan Perdana Menteri akan menggunakan **SOP Pengendalian Bencana Industri** yang menggariskan peranan dan tanggungjawab agensi-agensi dalam mengendalikan bencana industri. Tatacara pengendalian bencana dalam SOP ini boleh digunakan menghadapi apa-apa insiden atau bencana kimia yang berlaku.

Di samping menggunakan SOP tersebut, pihak Jabatan Alam Sekitar juga melaksanakan *community engagement and awareness raising*, dengan izin, bagi meningkatkan tahap pemahaman penduduk tempatan berkenaan langkah-langkah yang perlu diambil sekiranya berlaku insiden pencemaran atau bencana kimia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 27.11.2019 (RABU)

SOALAN NO. 8

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan adakah Kementerian berjaya menurunkan kadar inflasi dan kenaikan harga barangan terutamanya setelah Cukai Jualan dan Perkhidmatan (SST) dikuatkuasakan.

JAWAPAN

Yang di-Pertua,

1. Inflasi keseluruhan (*headline CPI*) mengukur peratus perubahan tahunan dalam Indeks Harga Pengguna (IHP) yang menunjukkan perubahan harga bagi barangan atau perkhidmatan bagi 12 kumpulan utama berbanding tahun sebelumnya.

2. Daripada 12 kumpulan utama ini, perubahan harga bagi kumpulan dengan wajaran tertinggi ialah Makanan & Minuman Bukan Alkohol (29.5%) yang amat mempengaruhi kadar inflasi secara keseluruhan.

3. Perubahan harga barangan pula bukan semata-mata kerana faktor cukai seperti pengenalan SST atau GST. Sebagai negara yang mengamalkan sistem ekonomi pasaran bebas dan terbuka, kuasa pasaran (*market forces*) berperanan sebagai faktor penentu kepada turun naik harga barangan di samping dipengaruhi oleh faktor-faktor dalaman dan luaran seperti berikut:

- a. faktor permintaan dan penawaran;
- b. kegiatan manipulasi harga oleh orang tengah;
- c. peningkatan kos pengeluaran dan kos logistik dan pengangkutan;
- d. perubahan cuaca dan bencana alam;
- e. kos pengimportan yang tinggi terutamanya bagi bahan makanan;
- f. kegiatan kartel dan monopoli; dan lain-lain faktor

4. Barangan dan Perkhidmatan (GST) telah mula dilaksanakan pada 1 April 2015 sehingga 31 Mei 2018. Mulai 1 Jun 2018 sehingga 31 Ogos 2018, Kerajaan telah menetapkan GST pada kadar sifar (*tax holiday*) sehingga pelaksanaan sistem pencukaian yang baru iaitu Cukai Jualan dan Perkhidmatan (SST) pada 1 September 2018.

5. Untuk menjawab soalan Yang Berhormat, kadar inflasi untuk 6 bulan selepas pelaksanaan SST adalah seperti berikut:

a. September 2018	-	0.3%
b. October 2018	-	0.6%
c. November 2018	-	0.2%
d. Disember 2018	-	0.2%
e. Januari 2019	-	- 0.7%
f. Februari 2019	-	- 0.4%

Untuk kumpulan Makanan & Minuman Bukan Alkohol, kadar inflasi adalah berikut

a. September 2018	-	0.5%
b. October 2018	-	1.2%
c. November 2018	-	1.1%
d. Disember 2018	-	0.7%
e. Januari 2019	-	1.0%
f. Februari 2019	-	1.0%

6. Jika kita buat bandingan angka-angka tersebut dengan kadar inflasi 6 bulan sebelum pemansuhan GST, ianya daripada Disember 2017 hingga Mei 2018, purata kadar inflasi bulanan adalah 2%. Bagi kadar inflasi kumpulan Makanan & Minuman Bukan Alkohol, kadar inflasi masa itu adalah dalam lingkungan 2 – 3%.

7. Oleh itu, secara kesimpulan, kadar inflasi selepas pelaksanaan SST adalah terkawal dan lebih rendah jika berbanding dengan tempoh pentadbiran sebelum ini yang melaksanakan sistem percukaian GST.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' ABDULLAH SANI B. ABDUL HAMID
(KAPAR)**

TARIKH : 27 NOVEMBER 2019

SOALAN

DATO' ABDULLAH SANI BIN ABDUL HAMID [KAPAR] minta **MENTERI DALAM NEGERI** menyatakan adakah Kementerian bercadang untuk mengkaji semula penggajian anggota agensi penguatkuasaan memandangkan cabaran tugas yang semakin hebat terutamanya PDRM dan Penjara.

JAWAPAN

Tuan Yang Di Pertua,

Kerajaan telah menyatakan kesediaan untuk mengkaji semula penggajian anggota dan pegawai Polis Diraja Malaysia ataupun PDRM. Mesyuarat Majlis Tindakan Ekonomi pada 11 Jun 2019 yang dipengerusikan oleh Yang Amat Berhormat Perdana Menteri berpandangan bahawa kajian tersebut perlu mengambil kira kekangan dan implikasi kewangan negara serta setara dengan skim-skim perkhidmatan yang lain. Kementerian Dalam Negeri telah mengadakan kajian dan telah membentangkan perkara ini kepada Kementerian Kewangan Malaysia pada 10 Julai 2019 dan memanjangkan permohonan ini ke Jabatan Perkhidmatan Awam ataupun JPA pada 20 Ogos 2019 untuk tindakan selanjutnya.

Terima kasih.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 27 NOVEMBER 2019 (RABU)

SOALAN

Dato' Sri Azalina Othman Said [Pengerang] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah punca kelewatan dalam membentangkan Akta Gangguan Seksual di Parlimen ini serta adakah akta ini juga akan melindungi kaum lelaki juga yang menjadi mangsa gangguan seksual.

JAWAPAN

Tuan Yang di-Pertua,

Bagi menggubal akta berkaitan gangguan seksual yang efektif dan komprehensif, Kementerian ini perlu mendapatkan input dan pandangan daripada pelbagai pihak. Ini dilaksanakan melalui platform sesi libat urus dengan pihak-pihak berkepentingan seperti Kementerian dan agensi yang berkaitan, Badan Bukan Kerajaan serta ahli-ahli akademik. Sesi libat urus dengan Ahli-ahli Parlimen juga telah dilaksanakan pada 16 Julai 2019 yang lepas. Selain itu, maklum balas daripada orang awam juga diperoleh melalui Tinjauan Soal Selidik Gangguan Seksual secara atas talian bermula pada 5 Ogos 2019 sehingga 5 September 2019 yang melibatkan seramai 28,852 responden di Malaysia. Terkini, satu perbincangan bersama Kementerian Kesihatan Malaysia (KKM) telah diadakan pada 24 Oktober 2019 berkenaan prosedur menangani kes gangguan seksual dalam kalangan penjawat awam di hospital, yang bertujuan untuk mengenal pasti kelompangan terhadap perundangan dan prosedur dalaman sedia ada agar ia boleh ditangani melalui penggubalan akta berkaitan gangguan seksual. Bagi menyediakan draf undang-undang tersebut, Kementerian juga telah mengadakan beberapa sesi perbincangan dengan wakil Jabatan Peguam Negara (AGC) untuk melihat aspek pemakaian Kanun Tatacara Jenayah dalam pengendalian kes-kes gangguan seksual.

Pada masa ini, Kementerian bersama Pasukan Projek Khas Rang Undang-Undang Gangguan Seksual yang terdiri daripada wakil Kementerian dan agensi Kerajaan, ahli-ahli akademik serta wakil Badan Bukan Kerajaan (NGO) yang mempunyai pengetahuan dan pengalaman yang luas berkenaan isu gangguan seksual sedang melakukan penambahbaikan terhadap draf rang undang-undang berkenaan berdasarkan maklum balas yang diperoleh daripada sesi libat urus dan perbincangan yang telah dilaksanakan. Antara elemen-elemen dalam draf tersebut yang sedang diperhalusi merangkumi definisi gangguan seksual yang menyeluruh, mekanisme pengaduan dan penyelesaian yang lebih efektif dan aspek perlindungan kepada pengadu. Elemen remedi dan penalti turut diberikan

SOALAN NO. 10

perhatian selain mengesyorkan standard pembuktian yang bersesuaian bagi kes-kes gangguan seksual. Kementerian juga berhasrat untuk melakukan penambahbaikan terhadap sistem keadilan sedia ada menerusi penubuhan tribunal khusus untuk mendengar dan menangani kes-kes gangguan seksual.

Tuan Yang di-Pertua,

Mengambil kira gangguan seksual boleh berlaku kepada sesiapa sahaja tanpa mengira usia, kaum ataupun agama dan insiden ini juga tidak terhad kepada berlainan jantina, malah boleh dilakukan oleh lelaki terhadap lelaki atau wanita terhadap wanita, maka rang undang-undang ini adalah terpakai kepada lelaki dan wanita.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 27 NOVEMBER 2019 (RABU)

SOALAN NO. 11

Minta **MENTERI PENDIDIKAN** menyatakan adakah Kerajaan mempunyai data yang lengkap berhubung kait dengan yuran setiap pengajian di kolej atau universiti swasta, Adakah Kementerian mempunyai dasar yang selaras dalam penetapan yuran-yuran bagi setiap bidang pengajian atau '*course*' di kolej dan universiti swasta.

JAWAPAN

Tuan Yang di-Pertua,

Untuk makluman Ahli Yang Berhormat, semua institusi pendidikan tinggi swasta (IPTS) yang ditubuhkan di negara ini adalah dikawal selia dan tertakluk kepada Akta Institusi Pendidikan Tinggi Swasta 1996

[Akta 555]. Kadar yuran pengajian di IPTS adalah tertakluk kepada syarat yang dikenakan oleh Ketua Pendaftar Institusi Pendidikan Tinggi Swasta seperti yang diperuntukkan di bawah seksyen 40 (1) Akta 555 dan peraturan-peraturan di bawahnya bagi menjamin kebajikan dan kepentingan pelajar.

Selain itu, kerajaan juga telah mewartakan Akta Kawalan Harga dan Antipencatutan 2011 [Akta 723] selaras dengan hasrat kerajaan untuk melindungi kepentingan pengguna dengan tidak dibebani caj perkhidmatan yang tinggi.

Yuran pengajian di IPTS merupakan salah satu sumber kewangan untuk menyokong kepada operasi sesebuah IPTS. Walau bagaimanapun, IPTS mestilah mematuhi siling atau had yuran pengajian yang diluluskan serta syarat-syarat lain yang ditetapkan oleh Ketua Pendaftar Institusi Pendidikan Tinggi Swasta dalam mana-mana kelulusan kursus pengajian. Kelulusan kadar yuran sesuatu kursus pengajian adalah berdasarkan kepada permohonan yang dikemukakan oleh IPTS dan mengambil kira jenis program, infrastruktur, fasiliti untuk pengajaran dan pembelajaran, bidang dan jenis pengajian serta mengikut kadar pasaran semasa. Oleh itu, IPTS hanya dibenarkan mengenakan yuran yang telah diluluskan oleh pihak Kementerian sahaja bagi setiap kursus pengajian yang ditawarkan kepada pelajar.

Yuran yang diluluskan oleh Kementerian bagi setiap IPTS boleh dicapai melalui laman sesawang Jabatan Pendidikan Tinggi (JPT) , KPM untuk melihat profil setiap IPTS dan yuran pengajian yang diluluskan. Berikut adalah link yang boleh dicapai melalui laman web JPT:https://drive.google.com/drive/folders/1vsunueyKymV81s55gmlKDhjYiH9b_LUf. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 27.11.2019 (RABU)

SOALAN NO. 12

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Suruhanjaya Syarikat Malaysia (SSM) menyediakan bantuan kepada syarikat-syarikat tempatan yang bergelut dengan masalah akibat daripada ketidaktentuan pasaran dan ekonomi semasa yang suram.

JAWAPAN

Yang di-Pertua,

1. Suruhanjaya Syarikat Malaysia (SSM) adalah sebuah agensi kerajaan yang berperanan sebagai pembekal maklumat korporat dan perniagaan serta badan yang mengawal selia undang-undang yang ditadbir olehnya, dan bukan sebagai agensi penyedia dana kepada sektor perniagaan.

2. Walau bagaimanapun, SSM turut mengambil bahagian di dalam usahanya untuk membantu dalam menggalakkan pertumbuhan ekonomi negara melalui pelbagai inisiatif berkonsepkan tanggungjawab sosial, tetapi masih tertakluk kepada skop bidang kuasa SSM.

3. Antara inisiatif yang telah dilaksanakan oleh SSM adalah seperti pengenalan skim bantuan untuk membantu para peniaga mendaftar dan memulakan perniagaan termasuklah golongan pelajar di peringkat pengajian tinggi dan orang kurang upaya. Antara skim-skim yang dimaksudkan adalah BizGrant SSM, Skim 1 Pelajar 1 Perniagaan dan Skim 1 OKU 1 Perniagaan.

4. BizGrant SSM adalah satu skim pemberian kepada peniaga-peniaga kecil dalam bentuk peralatan bagi menjalankan perniagaan dengan jumlah maksimum sebanyak RM 3,000 kepada setiap pemohon yang berjaya. Antara peralatan yang telah dibekalkan melalui skim ini adalah seperti peralatan menjahit, memasak dan sebagainya.

5. Skim 1 Pelajar 1 Perniagaan pula adalah satu skim yang memberi peluang kepada para pelajar di Institusi Pengajian Tinggi dalam negara untuk mendaftarkan perniagaan di bawah Akta Pendaftaran Perniagaan secara percuma. Melalui skim ini, hanya satu perniagaan sahaja dibenarkan untuk didaftarkan secara percuma bagi setiap seorang pelajar. Manakala, bayaran pembaharuan perniagaan bagi tahun-tahun selanjutnya tidak tertakluk di bawah skim ini.

6. Skim 1 OKU 1 Perniagaan adalah antara skim bantuan yang diberikan kepada golongan orang kurang upaya (OKU) untuk berkecimpung dalam dunia perniagaan. Melalui skim ini, setiap seorang OKU layak mendaftarkan satu perniagaan dan memperbaharui pendaftaran perniagaan tersebut secara percuma.

Sekian, terima kasih.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI
[BUKIT BENDERA]**

TARIKH : 27 NOVEMBER 2019 (RABU)

SOALAN

TUAN WONG HON WAI [BUKIT BENDERA] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah polisi-polisi baru yang telah dilaksanakan oleh Kerajaan untuk melindungi hak wanita dan hak kanak-kanak dan apakah inisiatif baru yang sedang dipelopori.

JAWAPAN

Tuan Yang di-Pertua,

Agenda mengarusperdana gender perlu menjadi keutamaan semua pihak bagi memastikan perspektif gender diambil kira dalam aspek penggubalan, perancangan dan pelaksanaan sesuatu dasar. Dalam hal ini, Kementerian sedang bekerjasama dengan pihak *United Nations Development Programme (UNDP)* untuk melihat dan meneliti keberkesanan pelaksanaan Dasar Wanita Negara dan Pelan Tindakan Pembangunan Wanita Negara (PTPWN) yang telah ditetapkan. Melalui kerjasama yang sedang dijalankan ini akan membantu Kementerian menyediakan pelan tindakan yang lebih baik dan komprehensif dengan mengambil kira isu-isu yang dihadapi oleh wanita termasuk dari aspek perlindungan dan keganasan terhadap wanita. Bagi mencapai hasrat ini juga, Kementerian sedang mengukuhkan peranan *Gender Focal Point* melalui pembentukan *Gender Focal Team* di setiap Kementerian dan agensi. Antara tindakan awal yang telah diambil adalah dengan melaksanakan program pembangunan kapasiti *Gender Focal Team KPWK* dan seterusnya akan diperluaskan ke agensi Kerajaan yang lain kerana tanggungjawab untuk melindungi wanita merupakan tanggungjawab bersama.

Kerajaan juga telah memperkenalkan program Caruman Sukarela Insentif Suri (i-Suri) bagi mewujudkan jaringan keselamatan sosial yang asas kepada kaum wanita. Ia bertujuan untuk memperkasa hak wanita dan mengiktiraf kepentingan peranan kaum wanita terutamanya dalam kalangan suri rumah.

Dari aspek perlindungan terhadap wanita pula, Kementerian dalam proses menubuhkan Jawatankuasa Menangani Keganasan Rumah Tangga yang antara lainnya berfungsi sebagai mekanisme untuk memantau, menyelaras dan menangani isu keganasan rumah tangga dengan lebih efektif melalui kerjasama strategik antara agensi Kerajaan dan Badan Bukan Kerajaan.

Tuan Yang di-Pertua,

Inisiatif-inisiatif untuk melindungi hak kanak-kanak pula adalah seperti:

- (i) cadangan penubuhan Jabatan Pembangunan Kanak-Kanak serta penambahan bilangan Pelindung dan Pembantu Pelindung kanak-kanak;
- (ii) program kesedaran yang lebih proaktif seperti:
 - a. kempen kesedaran mengenai pembuangan bayi dengan kerjasama syarikat swasta;
 - b. infografik pemilihan TASKA dimasukkan dalam Buku Kesihatan di Klinik Kesihatan Ibu dan Anak KKM; dan
 - c. video '*safe touch bad touch*' tertumpu kepada kanak-kanak melalui Youtube dengan kerjasama Google
- (iii) pengenalan sistem semakan pesalah jenayah seksual terhadap kanak-kanak dalam Daftar Kanak-Kanak;
- (iv) pengenalan program *Diversion* secara rintis sebagai pendekatan alternatif untuk mengendalikan pesalah kanak-kanak;
- (v) pengenalan projek rintis pemeliharaan berasaskan keluarga (PBK) untuk memastikan kanak-kanak dalam institusi boleh ditempatkan semula dalam persekitaran keluarga; dan
- (vi) sesi libat urus dan pembangunan strategi dan pelan menangani perkahwinan bawah umur dengan penglibatan Majlis Agama Islam Negeri dan Jabatan Agama Islam Negeri.

Tuan Yang di-Pertua,

Kementerian pada ketika ini juga sedang menyediakan Draf Strategi dan Pelan Menangani Punca Perkahwinan bawah Umur. Pelan ini telah diedarkan kepada semua Kementerian dan Majlis Agama Islam Negeri dan Jabatan Agama Islam Negeri agar dapat meneliti dan mempersetujui Pelan tersebut. Sehubungan itu saya merayu kepada Ahli-Ahli Yang Berhormat sekalian untuk mendapatkan kerjasama daripada Majlis Agama Islam Negeri dan Jabatan Agama Islam Negeri masing-masing untuk mengemukakan maklum balas terhadap draf pelan menangani perkahwinan bawah umur yang telah diedarkan tersebut. Kementerian amat mengharapkan agar pelan yang dibangunkan bersama-sama ini

SOALAN NO. 13

melalui beberapa siri libat urus dapat dilaksanakan dalam masa terdekat demi kesejahteraan kanak-kanak. Dengan pelaksanaan Pelan ini ia menunjukkan keseriusan dan komitmen Kerajaan bersama pihak Kerajaan Negeri dalam kita menangani punca perkahwinan bawah umur ini.

Usaha yang berterusan dan komprehensif untuk melindungi wanita dan kanak-kanak sememangnya memerlukan komitmen dan kerjasama yang jitu daripada semua pihak termasuk agensi Kerajaan, Badan Bukan Kerajaan dan juga masyarakat setempat bagi memastikan hak-hak mereka sentiasa dilindungi dan diiktiraf.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' HENRY SUM AGONG [LAWAS]

TARIKH : 27 NOVEMBER 2019 (RABU)

SOALAN

Minta **MENTERI PENDIDIKAN** menyatakan berapa buah sekolah daif di kawasan Parlimen Lawas yang akan dipulihkan dan dibina semula dan berapakah peruntukan yang disenaraikan untuk tujuan ini pada tahun hadapan 2020.

JAWAPAN

Tuan Yang di-Pertua,

Sehingga kini, terdapat 10 buah sekolah daif di Parlimen Lawas yang telah dinaik taraf dan dibangunkan semula dengan kos projek berjumlah RM72.83 juta. Projek tersebut meliputi satu (1) projek yang dilaksanakan pada tahun 2017, lapan (8) projek yang dilaksanakan pada tahun 2018 dan 1 projek yang dilaksanakan pada tahun 2019. Antara sekolah yang terlibat dalam projek pembangunan ini ialah SK Kg Lintang, SK Merapok, SK Punang, SK Siang-Siang, SK Long Tengoa, SK Ulu Merapok, SK Batu Lima, SK Kerangan, SK Kuala Lawas dan Sekolah Kebangsaan Trusan. Projek-projek ini merangkumi skop pembinaan blok pentadbiran, dewan terbuka, bilik darjah, bilik sains, tandas dan rumah guru.

Bagi projek pembangunan semula dan menaiktaraf sekolah-sekolah daif di dalam RP4, RMKe-11 Tahun 2020, khusus di Parlimen Lawas, satu (1) projek telah dimohon dan berada dalam senarai pertimbangan kelulusan MEA iaitu SK Long Sebang. Pada masa yang sama, SK Bario juga telah disenaraikan dalam senarai projek yang dicadangkan di dalam Peruntukan RM1 billion Bagi Penyelenggaraan Sekolah Daif Sarawak (Fasa 1).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB PUAN CHA KEE CHIN (RASAH)

TARIKH : 27 NOVEMBER 2019

SOALAN :

Tuan Cha Kee Chin [Rasah] minta **MENTERI DALAM NEGERI** menyatakan apakah pihak KDN telah mempunyai kaedah atau mekanisma baru untuk menangani permohonan kewarganegaraan khususnya untuk golongan warga emas yang berusia 60 tahun ke atas dan kanak-kanak tanpa taraf kewarganegaraan (Stateless Child).

JAWAPAN

Tuan Yang Di-Pertua,

Kementerian Dalam Negeri (KDN) sentiasa prihatin dengan isu dokumentasi dan pengenalan diri dalam kalangan penduduk negara ini dan antara langkah yang sedang diambil dalam menangani isu permohonan kewarganegaraan selaras dengan peruntukan di bawah Bahagian III Perlembagaan Persekutuan, *Citizenship Rules 1964* [LN82/1964] serta perundangan berkaitan yang berkuat kuasa dalam isu pendaftaran perkahwinan, kesahtarafan anak, peraturan imigresen dan lain-lain adalah seperti berikut:-

- a. Penguatkuasaan undang-undang berkaitan dengan penentuan kewarganegaraan yang mana kewarganegaraan individu ditentukan berdasarkan status perkahwinan dan taraf kewarganegaraan ibu bapa sewaktu kelahiran; dan

- b. Pertimbangan terhadap permohonan kewarganegaraan bagi individu berkeelayakan sama ada melalui pendaftaran atau penaturalisasian selaras dengan usaha KDN ke atas penambahbaikan komprehensif terhadap prosedur pengendalian standard (SOP) permohonan kewarganegaraan berdasarkan kepada pematuhan syarat di bawah Bahagian III Perlembagaan Persekutuan dan *Citizenship Rules* 1964 [LN82/1964] serta turut mengambil kira pelbagai aspek termasuklah kebajikan pemohon tanpa mengabaikan keselamatan dan kesejahteraan warganegara sedia ada.

Kementerian Dalam Negeri (KDN) telah memuktamadkan pengemaskinian prosedur pengendalian standard (SOP) permohonan kewarganegaraan di bawah Perkara 15A Perlembagaan Persekutuan bagi individu berumur bawah 21 tahun. SOP berkenaan yang akan dilaksanakan bermula tahun hadapan, mengandungi mekanisme pemakluman kepada pemohon berkaitan sebab-sebab sesuatu permohonan kewarganegaraan itu ditolak serta tempoh pemprosesan permohonan kewarganegaraan.

Manakala, bagi permohonan kewarganegaraan lain di bawah Perlembagaan Persekutuan, fakta dan dokumen sokongan yang dikemukakan oleh setiap pemohon akan diteliti secara *case-by-case* mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes termasuklah tempoh mendapatkan laporan tapisan keselamatan yang dijalankan Polis Diraja Malaysia (PDRM).

Ibu bapa dan penjaga kepada individu yang bertaraf Bukan Warganegara bertanggungjawab sepenuhnya untuk menguruskan kewarganegaraan, dokumen pengenalan diri dan dokumen perjalanan dengan negara asal bagi mengelakkan ketiadaan dokumen pengenalan diri, keberadaan tidak sah di Malaysia dan seterusnya disalah anggap sebagai tidak memiliki kewarganegaraan dari mana-mana negara (*stateless*).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : TUAN LUKANISMAN BIN AWANG SAUNI
[SIBUTI]
TARIKH : 27 NOVEMBER 2019 (RABU)

SOALAN NO. 16

Minta **MENTERI PENDIDIKAN** menyatakan apakah langkah Kementerian untuk membantu golongan guru untuk mendapat khidmat pemeriksaan kesihatan mental yang mengakibatkan kemurungan kerana beban tugas di sekolah dan apakah dasar baru Kementerian bagi menambah baik polisi sedia ada bagi memastikan warga pendidik tidak terbeban dengan tekanan perasaan semasa bertugas.

JAWAPAN

Tuan Yang di-Pertua,

Kementerian Pendidikan Malaysia (KPM) telah menggunakan Ujian Saringan Minda Sihat atau *Depression Anxiety Stress Scale* (DASS) untuk mengenal pasti tahap kemurungan, kebimbangan dan tekanan. Berdasarkan kepada saringan yang dibuat, klien yang dikenal pasti mengalami masalah kemurungan, kebimbangan dan tekanan akan dirujuk kepada klinik psikiatri. KPM juga telah melancarkan Program #3A (Sedar, Peka, Tindak) pada 10 Julai 2019. Matlamat program ini adalah untuk meningkatkan kesedaran kesejahteraan mental dalam kalangan guru di seluruh negara yang disampaikan oleh pentadbir sekolah masing-masing. Ini merupakan satu wadah untuk membantu warga guru dalam menguruskan tekanan perasaan dalam menjalankan tugas harian.

Untuk makluman Ahli Yang Berhormat, di bawah Jawatankuasa Mengkaji Beban Tugas Guru, KPM telah menggariskan strategi menangani beban tugas guru kepada tiga fasa iaitu jangka masa pendek, pertengahan dan panjang. Bagi inisiatif jangka masa pendek, YB Menteri Pendidikan Malaysia telah mengumumkan lima inisiatif untuk dilaksanakan seawal bulan Januari 2019 yang berkuat kuasa serta-merta. Inisiatif yang telah diumumkan melibatkan penambahbaikan kaedah pengurusan fail, pelaporan dan dokumentasi, penambahbaikan proses pengurusan data dan sistem online, autonomi pelaksanaan LINUS dan pentaksiran Tahap 1, penyeragaman borang dan proses pemantauan serta penyelarasan penubuhan jawatankuasa pada peringkat sekolah.

Bagi inisiatif jangka masa sederhana untuk dilaksanakan bermula seawal Januari 2019 sehingga ke akhir tahun ini, beberapa inisiatif telah dan akan dilaksanakan, bagi mengurangkan isu beban tugas guru berkaitan Isu SKPMg. Guru perlu membuat semakan berkala terhadap tugas mereka dan menyediakan dokumen/eviden berkaitan tugas tersebut. Jemaah Nazir telah melaksanakan beberapa tindakan untuk menangani isu ini iaitu:

1. Audit verifikasi pelaksanaan SKPMg2 oleh pihak Jemaah Nazir telah dimansuhkan sekolah hanya perlu melaksana audit sendiri bagi mengenal pasti kekuatan dan kelemahan masing-masing.
2. Eviden/dokumen pelaksanaan sesuatu tugas/aktiviti/program yang dilaksanakan di sekolah boleh disediakan dalam pelbagai bentuk (*hard copy/soft copy*).
3. Fasa semakan dan penilaian sendiri dibuka dua kali setahun iaitu pada bulan Januari - Mac (Fasa 1) dan Ogos - November (Fasa 2) berbanding tiga (3) kali sebelum ini.
4. Semua pejabat Jemaah Nazir di seluruh negara menyediakan khidmat Klinik SKPMg2 yang boleh dihadiri secara sukarela oleh mana-mana sekolah yang memerlukan maklumat dan khidmat nasihat berkaitan SKPMg2.

Bagi inisiatif jangka panjang pula yang akan dilaksanakan seawal Januari 2020, beberapa jawatankuasa kecil telah dibentuk untuk memperhalusi strategi dan cadangan bagi mengatasi isu guru yang banyak terlibat dalam program dan aktiviti sukan, seni, ko-kurikulum dan akademik yang bertindan-tindih menyebabkan mereka sukar fokus dalam bilik darjah. Beberapa strategi telah dirangka seperti pembentukan takwim di peringkat kebangsaan, penyelarasan dengan pihak jabatan pendidikan negeri (JPN) dan pejabat pendidikan daerah (PPD) serta pemberian autonomi di peringkat sekolah.

Selain itu, bagi memastikan keberadaan guru di dalam bilik darjah, penglibatan guru dalam melaksanakan peranan jurulatih utama atau fasilitator akan dikurangkan, sebaliknya penglibatan pensyarah-pensyarah Institut Pendidikan Guru (IPG) dan English Language Training Centre (ELTC) akan dipertingkatkan. Jawatankuasa kecil ini juga berperanan untuk memikirkan kaedah terkini untuk menatarkan kurikulum dalam bentuk teknologi seperti telekonferens, *youtube* dan rakaman-rakaman yang dimuat naik dalam *website* rasmi Bahagian Pembangunan Kurikulum (BPK) bagi mengurangkan isu guru terpaksa keluar meninggalkan bilik darjah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : TUAN AKMAL NASRULLAH BIN MOHD.
NASIR (JOHOR BAHRU)**

TARIKH : 27 NOVEMBER 2019

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **MENTERI DALAM NEGERI** menyatakan tindakan-tindakan susulan yang akan diambil bagi mengatasi kesesakan di Tambak Johor seperti yang dibincangkan dalam Mesyuarat Jawatankuasa Khas Mengenai Kesesakan di Tambak Johor pada 21 Ogos yang lalu.

JAWAPAN

Tuan Yang Di Pertua,

Seperti termaklum, Mesyuarat Jawatankuasa Khas Mengenai Kesesakan di Tambak Johor Bilangan 1 Tahun 2019 yang telah diadakan pada 21 Ogos 2019 yang lalu dan dipengerusikan oleh YAB Perdana Menteri, Tun Dr. Mahathir bin Mohamad. Mesyuarat Jawatankuasa Khas ini antara lain bertujuan membincang dan mempertimbangkan perkara-perkara berkaitan dengan isu kesesakan di Tambak Johor yang memerlukan keputusan dasar Kerajaan.

Melalui gerak kerja awal yang telah dilaksanakan oleh Kementerian Dalam Negeri yang bertindak sebagai urus setia, terdapat 23 inisiatif pelaksanaan telah diperhalusi dan dipersetujui meliputi enam (6) skop seperti Operasi dan Penguatkuasaan, Dasar dan Perundangan, Pengurusan Sumber Manusia, Pengurusan Kewangan, Aset dan

Sistem Maklumat, Kerjasama Antarabangsa, dan Pengurusan Media Sosial. Pelaksanaan semua 23 inisiatif tersebut adalah berdasarkan tiga (3) proses berikut iaitu:

- (i) **Sembilan (9) inisiatif** dalam **Jangka Masa Pendek** iaitu dengan tempoh pelaksanaan antara satu hingga enam bulan;
- (ii) **Sembilan (9) inisiatif** dalam **Jangka Masa Sederhana** iaitu dengan tempoh pelaksanaan antara enam hingga 12 bulan; dan
- (iii) **Lima (5) inisiatif** dalam **Jangka Masa Panjang** iaitu dengan tempoh pelaksanaan lebih daripada 12 bulan.

Selain itu juga, Mesyuarat Jawatankuasa Khas tersebut telah memutuskan beberapa inisiatif baharu untuk dilaksanakan seperti berikut iaitu:

- (i) meluluskan peruntukan khas dan tambahan bagi naik taraf BSI dan KSAB sebanyak RM82.7 juta;
- (ii) melaksana kajian keperluan kapasiti penggunaan masa hadapan bagi pintu masuk negara;
- (iii) melebar dan memanjang Tambak Johor;
- (iv) membina laluan pejalan kaki berbumbung di Tambak Johor;
- (v) membina laluan kapal di Tambak Johor; dan
- (vi) membesarkan kompleks pintu masuk sedia ada di Tambak Johor.

Bagi memastikan semua keputusan Mesyuarat Jawatankuasa Khas tersebut dilaksanakan dalam tempoh yang ditetapkan, dua (2) mekanisme gerak kerja diwujudkan seperti berikut:

- (i) **Jawatankuasa Penyelarasan Keputusan** dipengerusikan oleh YB Menteri Dalam Negeri; dan

- (ii) **Lima (5) Technical Working Groups (TWGs)** yang melibatkan aspek menaik taraf kemudahan kompleks pintu masuk di Tambak Johor; dasar sumber manusia; melaksanakan *automated check point* dan *border system*; kajian kebolehlaksanaan keperluan kapasiti penggunaan pintu masuk; dan pengurusan pelan komunikasi.

Berdasarkan pemerhatian daripada aspek pengoperasian, pelaksanaan inisiatif Jangka Masa Pendek telah mengurangkan kesesakan lebih kurang lima **(5) peratus** semasa waktu puncak yang normal (tidak termasuk cuti yang bersambung). Sehubungan itu, pelaksanaan sepenuhnya bagi semua inisiatif tersebut termasuk inisiatif Jangka Masa Sederhana dan Panjang dijangka dapat menangani **isu kesesakan di Tambak Johor**.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI ISMAIL BIN MOHAMED
SAID [KUALA KRAU]**

TARIKH : 27 NOVEMBER 2019 (RABU)

SOALAN

Minta **MENTERI PENDIDIKAN** menyatakan langkah yang diambil pihak Kementerian bagi memastikan para pelajar tidak ketinggalan dalam pelajaran akibat penutupan sekolah susulan masalah jerebu. Ini memandangkan kebanyakan pelajar sedang dalam persiapan menghadapi peperiksaan utama seperti PT3, SPM dan STPM.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengeluarkan Surat Siaran Kementerian Pendidikan Malaysia Bil. 8 Tahun 2016 Garis Panduan Pengurusan Pengajaran dan Pembelajaran Akibat Bencana. Garis panduan ini menjadi rujukan kepada pihak sekolah berkenaan Pengajaran dan pembelajaran (PdP) semasa negara dilanda bencana. Kaedah PdP yang dicadangkan ialah kaedah sendiri seperti yang berikut:

1. murid membuat tugas di rumah/asrama secara manual atau talian kerana sekolah ditutup atau murid terputus akses untuk ke sekolah akibat bencana;
2. guru memberi tugas kepada murid secara langsung di sekolah atau memuat naik tugas dalam platform pembelajaran maya atau melalui aplikasi media sosial yang lain seperti *WhatsApp*, *e-mel*,

Facebook, sync dan Telegram kepada murid yang mempunyai kemudahan tersebut;

3. murid menghantar tugas selepas sekolah dibuka semula atau dihantar secara dalam talian; dan
4. guru memberi maklum balas selepas sekolah dibuka semula atau secara dalam talian.

Untuk makluman Ahli Yang Berhormat, KPM sentiasa memastikan murid tidak ketinggalan dalam pelajaran mereka, terutama kepada murid yang akan menduduki peperiksaan awam. Sekiranya Agensi Pengurusan Bencana Negara atau *National Disaster Management Agency* (NaDMA) tidak mengisytiharkan darurat yang disebabkan oleh masalah jerebu, maka Pentaksiran Pusat (PT3) dan peperiksaan awam yang lain (UPSR, STAM, SPM, dan STPM) akan diteruskan dengan pemantauan ketat oleh Jabatan Pendidikan Negeri (JPN), Pejabat Pendidikan Daerah (PPD) dan pihak sekolah dengan mengambil tindakan berdasarkan Pekeliling Persediaan Menghadapi Jerebu Yang Mengancam Perjalanan Peperiksaan (Operasi Topeng) Bil.1/2005 dan Surat Siaran Lembaga Peperiksaan bertarikh 21 Oktober 2015: Pelaksanaan Operasi Topeng Semasa Pengurusan Peperiksaan.

Namun begitu, jika diisytiharkan darurat akibat jerebu prosedur berikut perlu dipatuhi:

1. Pengumuman penangguhan pentaksiran pusat atau peperiksaan awam akibat jerebu dibuat oleh YB Menteri Pendidikan melalui pengumuman rasmi media massa dan surat rasmi.
2. Penangguhan ujian lisan atau ujian bertulis (PT3, STPM) hanya bagi daerah/kawasan terjejas jerebu dengan bacaan Indeks Pencemaran Udara (IPU) tahap merbahaya.
3. Pelaksanaan pentaksiran pusat diteruskan bagi daerah/kawasan yang tidak terjejas jerebu dan daerah/kawasan terjejas jerebu tetapi bacaan IPU rendah memandangkan PT3 merupakan pentaksiran pusat yang tidak bersifat *high stake*. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 27 NOVEMBER 2019 (RABU)

SOALAN NO. 19

Minta **MENTERI PERTANIAN DAN INDUSTRI ASAS TANI** menyatakan kejayaan program estet padi setakat ini. Apakah masalah terbesar dalam usaha mewujudkan estet padi.

JAWAPAN

Tuan Yang di-Pertua,

1. Untuk makluman Ahli Yang Berhormat, program estet padi ini boleh melibatkan beberapa model pengurusan ladang secara berpusat mulai peringkat penanaman, penuaian sehingga ke pemasaran. Buat masa ini, Kerajaan berusaha mengetengahkan idea penyatuan pengurusan ladang yang akan diuruskan oleh satu badan pengurusan samada seperti syarikat *Special Purpose Vehicle* (SPV) atau koperasi. Konsep penyatuan pengurusan tanah ini akan hanya melibatkan penyatuan pengurusan tanah tanpa sebarang pengambilalihan atau pertukaran hak milik tanah pesawah. Buat masa ini, beberapa program sedia ada di bawah Projek Pemacu Pertanian (PPP) seperti *Entry Point Project*, EPP#10 dan EPP#11 boleh diambil sebagai asas pelaksanaan konsep estet padi ini. Konsep estet padi ini akan memberi kesan positif kepada pemilik tanah sawah terutamanya yang bersaiz kecil apabila pengurusan tanah ini disatukan di bawah satu badan pengurusan.

2. Antara manfaat pesawah-pesawah daripada program estet padi adalah seperti berikut:

- i. Keseragaman dalam pengurusan estet padi secara efisien;
- ii. Pengurangan kos pengeluaran padi berdasarkan pelaksanaan Projek Estet Padi dilaksanakan secara berpusat selain menjimatkan sumber seperti input;
- iii. Menambah pengeluaran hasil padi melalui pelaksanaan projek secara berskala besar dan seterusnya dapat meningkatkan pendapatan pesawah; dan
- iv. Meningkatkan kecekapan pengurusan ladang di mana aktiviti penanaman padi dilaksanakan secara seragam dan mematuhi syor yang ditetapkan seperti jadual penanaman dan *Rice Check*.

3. Pertubuhan Peladang Kawasan (PPK) dan pelbagai agensi berkaitan seperti Lembaga Pertubuhan Peladang (LPP), Jabatan Pertanian (DOA) dan Institut Penyelidikan dan Kemajuan Pertanian Malaysia (MARDI) boleh menjadi pemangkin pelaksanaan konsep estet padi dan penyatuan pengurusan tanah sawah ini. Agensi berkaitan boleh memainkan peranan dalam aspek penggembleran tenaga kerja, penyelarasan jadual gerak kerja, pengagihan sumber dan input, khidmat bimbingan dan pemasaran. Melalui estet padi, tanah sawah milik petani didaftarkan melalui PPK untuk menjadi satu kawasan pengeluaran padi yang luas dan tersusun. Dengan pelaksanaan aktiviti persawahan secara sistematik dan mendisiplinkan peladang kepada amalan pengurusan ladang yang baik (myGAP), hasil padi dapat ditingkatkan secara optima yang akhirnya akan menjana peningkatan pendapatan kepada pemilik tanah dan pesawah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 27 NOVEMBER 2019

SOALAN

DATO' SRI BUNG MOKTAR BIN RADIN [KINABATANGAN] minta **MENTERI DALAM NEGERI** menyatakan sejauh manakah kejayaan Kerajaan mengawal perairan Sabah dari dicerobohi sejak penubuhan ESSCOM. Berapa ramaikah pendatang asing di Sabah yang telah dihantar pulang ke negara asal dan berapa ramaikah pendatang asing yang masih berada di Sabah.

JAWAPAN

Tuan Yang Di-Pertua,

Eastern Sabah Security Command (ESSCOM) telah ditubuhkan pada tahun 2003 berperanan penting dalam mengawal perairan negeri Sabah amnya dan *Eastern Sabah Security Zone* (ESSZONE) khasnya meliputi 1,400 km kawasan Pantai Timur Sabah bermula dari Kudat hingga ke Tawau. Sehingga tahun 2019, sejumlah 14 kes cubaan menculik di kawasan ESSZONE telah dipatahkan melalui tindakan eksekutif serta perkongsian maklumat yang efektif. Keberhasilan ini dapat dinilai melalui maklum balas positif rakyat di kawasan ESSZONE yang menyambut baik peranan ESSCOM yang sentiasa berusaha mencapai penurunan kes penculikan untuk wang tebusan atau dengan izin, *Kidnapping For Ransom* (KFR) setiap tahun.

SOALAN NO : 20

Setakat ini, ESSCOM telah berjaya menembak mati 12 orang penjenayah rentas sempadan yang disyaki terlibat dalam penculikan untuk wang tebusan di sekitar perairan ESSZONE dalam tempoh dua tahun sejak 2017. ESSCOM sentiasa berusaha keras memperkasa kawalan keselamatan termasuk bekerjasama dengan pasukan keselamatan di Filipina sehingga 5 orang elemen ASG/KFR External telah berjaya dihapuskan.

Pada masa yang sama, ESSCOM turut bekerjasama dengan Cawangan Khas Kontinjen Sabah dan Bukit Aman dalam menjejaki dan mengesan elemen pengganas DAESH di ESSZONE. Pada 4 Disember 2017, ESSCOM telah berjaya menangkap 4 orang lelaki (warga Indonesia) yang disyaki sebagai *Foreign Terrorist Fighter* (FTF) di Sandakan, Sabah. Mereka ditangkap semasa dalam perancangan untuk ke Sulu, Selatan Filipina dengan menggunakan pintu keluar tidak sah. Kes dibicarakan pada 10 Oktober 2018 di bawah Seksyen 130J (Akta 574) dan dijatuhkan hukuman 10 tahun penjara dan akan dihantar pulang ke negara asal selepas menjalani hukuman penjara di negara ini.

ESSCOM turut terlibat aktif dalam membanteras aktiviti jenayah rentas sempadan. Pada 12 Mei 2019, ESSCOM telah berjaya merampas sejumlah 47,633 karton rokok seludup bernilai RM735,342.00 di Daerah Tawau. Sementara itu pada 20 Mei 2019, di *Road Check Point* (RCP) dengan izin di Sapi Nangoh, Beluran, ESSCOM telah merampas sebanyak 84,500 karton rokok seludup bernilai RM455,000.00. Rampasan berikutnya pada 12 Jun 2019 oleh ESSCOM di *Road Check Point* (RCP) Kalabakan, Tawau mencatatkan rampasan sebanyak 7,620 karton rokok seludup bernilai RM464,800.00 menjadikan jumlah keseluruhan rampasan bernilai RM1,655,142.00. Semua kes disiasat dibawah Seksyen 135 (1)(d) Akta Kastam 1967.

Pada 18 Mei 2019, Pasukan ESSCOM turut membuat tangkapan dan rampasan ke atas 220 ekor buaya yang dipercayai untuk diseludup bagi memenuhi permintaan tempatan. 4 orang telah berjaya ditangkap dan kes telah disiasat di bawah Enakmen Pemuliharaan Hidupan Liar 1997.

Tuan Yang DiPertua,

Melalui kerjasama bersepadu dan tindakan eksekutif antara ESSCOM dan Jabatan Imigresen Sabah, seramai 13,712 Pendatang Tanpa Izin (PTI) telah ditangkap di negeri Sabah sejak tahun 2017 sehingga September 2019. Jumlah tangkapan telah menunjukkan penurunan pada tahun 2018 yang menyaksikan 4,845 orang PTI ditangkap berbanding 5,091 orang pada tahun 2017. Manakala bagi tahun 2019 sehingga bulan September memperlihatkan seramai 3,776 orang PTI telah ditangkap. Pendatang Tanpa Izin (PTI) dari Filipina dan Indonesia dilihat menguasai carta statistik jumlah tangkapan yang dominan di mana bagi tempoh Januari 2019 hingga September 2019 jumlah tangkapan yang dibuat ke atas PTI Filipina adalah seramai 2,836 orang manakala 837 orang bagi PTI Indonesia.

Berhubung persoalan berapa ramai Pendatang Tanpa Izin (PTI) di Sabah yang telah dihantar pulang, pihak Majlis Keselamatan Negara (MKN) Negeri Sabah telah melaksanakan pengusiran kepada seramai 32,570 orang Pendatang Tanpa Izin (PTI) dalam tempoh dua tahun bermula 2017 hingga 2019. Daripada jumlah keseluruhan ini, seramai 12,392 orang PTI telah dihantar pulang ke negara asal bagi tahun 2018 berbanding 12,239 orang PTI bagi tahun 2017. Bagi tahun 2019 sehingga bulan September pula, MKN Sabah telah mengusir seramai 7,939 orang PTI ke negara asal.

Sementara itu, berdasarkan kepada data dari Jabatan Perangkaan Negara, penduduk di negeri Sabah adalah berjumlah 4.6 Juta orang. Daripada jumlah ini, seramai 650 ribu orang adalah terdiri daripada Pendatang Tanpa Izin (PTI). Walau bagaimanapun, daripada jumlah ini seramai 250 ribu orang tergolong dalam kategori PTI yang memegang Pas IMM13, Kad Burung-burung dan Sijil Banci yang telah diletakkan di bawah pengurusan Jawatankuasa Pengurusan Warga Asing di Sabah (JKPWAS).

PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : DATO' SERI HISHAMMUDDIN BIN TUN
HUSSEIN (SEMBRONG)

TARIKH : 27 NOVEMBER 2019 (RABU)

SOALAN

Minta **MENTERI PERTAHANAN** menyatakan :-

- (a) adakah Kementerian bercadang untuk melaksanakan tender terbuka bagi pembekalan dan penyelenggaraan aset untuk mengurangkan kos penyelenggaraan aset; dan
- (b) apakah kesannya kepada keupayaan Kementerian untuk mengoptimumkan kepakaran pengeluar Original Equipment Manufacturer (OEM) aset dalam penyelenggaraan.

JAWAPAN

Tuan Yang di-Pertua,

Kementerian Pertahanan telah mula melaksanakan perolehan pembekalan dan penyenggaraan aset secara tender terbuka selaras dengan Manifesto Kerajaan Pakatan Harapan dan tatacara perolehan yang sedang berkuatkuasa serta sejajar dengan arahan Kementerian Kewangan pada tarikh 29 Jun 2018, berkenaan Penambahbaikan Tadbir Urus dan Pelaksanaan Perolehan Kerajaan.

Perolehan pembekalan dan penyenggaraan aset secara tender terbuka tidak akan menyekat pihak Kerajaan untuk melaksanakan kontrak dengan *Original Equipment Manufacturer* (OEM). Dalam masa yang sama, perolehan secara tender terbuka memberi perkembangan yang positif kepada Kementerian dari aspek peningkatan kepakaran Angkatan Tentera Malaysia (ATM), hasil daripada *Transfer of Technology* (ToT) dan *Transfer of Knowledge* (ToKH), yang diperolehi melalui program *Industrial Collaboration Programme* (ICP).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 27 NOVEMBER 2019 (RABU)

SOALAN

Minta **MENTERI PENDIDIKAN** menyatakan sama ada Kementerian berhasrat untuk mewujudkan pembelajaran hak asasi manusia dan pendidikan seks di setiap peringkat pendidikan sama ada di sekolah mahupun di institusi pengajian tinggi.

JAWAPAN

Tuan Yang di-Pertua,

Pihak Kementerian Pendidikan Malaysia (KPM) sentiasa berusaha dan komited untuk memberi penerangan dan kesedaran kepada murid-murid tentang hak asasi manusia. Untuk makluman Ahli Yang Berhormat, melalui Pendidikan Sivik yang dijalankan di sekolah, murid-murid telah pun diajar tentang hak asasi manusia di bawah tajuk nilai bertanggungjawab.

Di peringkat institusi pengajian tinggi pula, pembelajaran hak asasi manusia telah diserapkan ke dalam Matapelajaran Pengajian Umum (MPU) melalui kursus Penghayatan Etika dan Peradaban yang ditawarkan di institusi pendidikan tinggi. Melalui kursus ini, pelajar akan didedahkan dengan ilmu berkaitan isu kesamarataan peluang dan keadilan sosial. Selain itu, pelajar juga didedahkan kepada hak asasi manusia melalui program dan aktiviti kokurikulum berbentuk kelab, persatuan, sukan dan badan beruniform.

Berkaitan dengan pendidikan seks pula, Pendidikan Kesihatan Reproduktif dan Sosial (PEERS) yang merangkumi elemen 'Pendidikan Seksualiti' telah pun dijalankan melalui kurikulum Pendidikan Kesihatan sejak tahun 1989 di sekolah menengah dan tahun 1994 di sekolah rendah. Silibus PEERS yang merangkumi topik seperti hak kanak-kanak, jenayah seksual dan keganasan rumahtangga digubal berdasarkan kepada tahap perkembangan kognitif serta kesesuaian peringkat umur kumpulan sasaran.

Di peringkat institusi pengajian tinggi, banyak program yang berkaitan dengan pendidikan seks dibuat untuk meningkatkan kesedaran pelajar seperti Seminar Pendidikan Seks menurut Perspektif Islam, pelaksanaan kuliah-kuliah agama dan moral, dan perkongsian ilmu dari tokoh-tokoh akademik. Pihak Kementerian dan institusi pendidikan tinggi juga melaksanakan kerjasama dengan pihak Polis DiRaja Malaysia (PDRM), Kementerian Pembangunan Wanita, Keluarga dan Masyarakat (KPWKM), serta Kementerian Komunikasi dan Multimedia Malaysia (KKMM) yang berperanan dalam membuat hebahan tentang isu-isu semasa negara termasuklah mengadakan forum, ceramah dan *roadshow* kesedaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 27 NOVEMBER 2019 (RABU)

SOALAN NO. 24

Minta **MENTERI PENDIDIKAN** menyatakan :-

- a. Apakah pihak Kementerian mempunyai rancangan untuk mengubah suai sistem pembelajaran sekolah menengah untuk meningkatkan pendedahan dan pengetahuan memandangkan remaja 18 tahun akan mempunyai hak mengundi ; dan
- b. Adakah pihak Kementerian mempunyai rancangan yang teliti untuk mengelakkan supaya aktiviti sekolah serta pusat pengajian tinggi tidak dimanipulasi oleh parti politik.

JAWAPAN

Tuan Yang di-Pertua,

- a. Kementerian Pendidikan Malaysia (KPM) sentiasa berusaha untuk meningkatkan kesedaran murid sebagai persediaan menjadi pengundi apabila mereka berumur 18 tahun kelak. KPM telah memasukkan tajuk dan kandungan yang berkaitan dengan pilihan raya dalam kurikulum Sejarah yang sedang dilaksanakan pada masa kini. Tajuk ini diajar kepada murid secara berbeza-beza mengikut aras dan tahap keupayaan murid sama ada di peringkat rendah atau menengah. Selain daripada mata pelajaran Sejarah, pelaksanaan Pendidikan Sivik di sekolah juga memberi pendedahan kepada murid tentang literasi politik pengundi muda dengan membincangkan beberapa tajuk seperti Sistem Demokrasi Berparlimen, Pemupukan Jati Diri, Sistem Raja Berperlembagaan, Rukun Negara, Semangat Patriotik dan Cintai Malaysia.

Selain daripada pendedahan melalui kurikulum dan kokurikulum, murid juga akan terlibat dengan pemilihan ketua murid melalui model ala pilihanraya. KPM dengan kerjasama Suruhanjaya Pilihanraya (SPR) menjalankan sesi sindikasi dan simulasi pemilihan ketua murid melalui mekanisme pilihanraya sebagai projek rintis di sekolah. KPM berpandangan pelaksanaan model pilihanraya yang dikendalikan oleh SPR perlu disesuaikan dengan skop dan tujuan proses pemilihan ketua murid sekolah.

Dapatan program rintis tersebut dijadikan asas kepada penyediaan garis panduan pelaksanaan proses pilihanraya di sekolah bagi tujuan pemilihan ketua murid. Bagi tujuan tersebut, KPM akan mengeluarkan Surat Pekeliling Ikhtisas (SPI) baharu yang akan memberikan kebenaran kepada pihak sekolah memperluas penggunaan “speakers corner” sebagai platform calon pengawas murid mempromosi keupayaan diri dan membenarkan proses pemilihan ala pilihanraya di sekolah. SPI baharu ini akan membatalkan SPI Bil. 5 Tahun 2010 yang melarang pilihanraya diadakan di sekolah bagi tujuan pemilihan ketua murid.

Selain daripada itu, KPM juga sedang meneliti kebolehlaksanaan syor Jawatankuasa Dasar Pendidikan Negara (JKDPN) bagi menambah baik penyampaian pendidikan termasuklah syor-syor yang berkaitan kurikulum yang berkaitan perubahan hak mengundi dalam kalangan pelajar di sekolah dan peringkat pendidikan tinggi.

Tuan Yang di-Pertua,

- b. KPM juga sentiasa berusaha untuk memastikan unsur politik tidak mempengaruhi urusan sekolah dalam usaha menghasilkan modal insan yang seimbang dan berjiwa patriotik. Namun begitu, KPM tidak pernah menetapkan sebarang dasar yang menghalang Ahli Yang Berhormat atau wakil rakyat daripada menghadiri program-program yang dianjurkan oleh pihak sekolah. Dalam hal ini, Kementerian mengeluarkan garis panduan kepada pentadbir sekolah melalui Surat Pekeliling Iktisas (SPI) Bil.3/2008: Mengundang Orang-orang Kenamaan ke Upacara Sekolah dan Penggunaan Premis Sekolah oleh Pihak Luar. Tujuan SPI ini adalah untuk memastikan program yang dijalankan di sekolah mencapai objektif yang ditetapkan dan untuk memastikan kemudahan yang terdapat di sekolah tidak disalahguna oleh pihak luar.

Semua majlis di sekolah yang melibatkan orang-orang kenamaan atau individu tertentu hendaklah mendapat kebenaran daripada Kementerian Pendidikan melalui Pengarah Pendidikan Negeri. Keutamaan diberikan kepada YB Menteri Pendidikan, Ketua Setiausaha Kementerian Pendidikan, Ketua Pengarah Pelajaran Malaysia, Pengarah Pendidikan Negeri atau wakil-wakil mereka untuk majlis perasmian samada di peringkat Jabatan Pendidikan Negeri (JPN), PPD atau pun di peringkat sekolah.

Di peringkat pendidikan tinggi, KPM telah melaksanakan beberapa pendekatan bagi memperkasakan peranan mahasiswa (*student empowerment*) sejajar dengan penerapan konsep kasih sayang, kegembiraan, hormat menghormati dan manusiawi (*love, happiness, mutual respect and humanity*).

Mahasiswa juga diberi kebebasan penuh dalam pelaksanaan Pilihanraya Kampus (PRK) melalui penubuhan Jawatankuasa Pilihanraya Pusat (CEC) universiti masing-masing yang akan menentukan proses-proses kerja, tarikh PRK serta perkara berkaitan selagi mematuhi peruntukan perundangan.

Pihak KPM juga sedang dalam merangka pelaksanaan kerjasama bersama-sama Suruhanjaya pilihanraya (SPR) melalui Akademi Pilihanraya (APR) bagi memberi pendedahan dan kesedaran kepada mahasiswa tentang hak-hak mereka sebagai warganegara Malaysia dan juga sebagai pengundi yang bertanggungjawab serta mampu melaksanakannya dengan berkesan.

Pengenalan konsep universiti sebagai medan ilmu yang terbuka juga diharapkan dapat menyampaikan mesej kepada mahasiswa bahawa setiap kebebasan datang bersama kebertanggungjawaban demi melahirkan mahasiswa yang holistik, berdaya saing dan mampu menjulang nama negara di mata dunia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 27 NOVEMBER 2019 (RABU)

SOALAN NO. 25

Minta **MENTERI PENDIDIKAN** menyatakan apakah status terkini kajian yang telah dilakukan oleh Jawatankuasa khas pengumpulan maklum balas berhubung dengan pengiktirafan UEC oleh kerajaan, yang dipercayai telah menyempurnakan tugas mereka pada bulan Julai yang lepas.

JAWAPAN

Tuan Yang di-Pertua,

Untuk makluman Ahli Yang Berhormat, Pasukan Petugas Dasar *Unified Examination Certificate* (PPDUEC) dalam peringkat akhir penulisan laporan mengenai isu pengiktirafan sijil UEC sebagai syarat am kelayakan untuk memasuki institusi pengajian tinggi awam (IPTA). Kementerian optimis laporan lengkap berkenaan akan berjaya diserahkan dalam tahun ini juga. Dapatan dan syor-syor berkaitan akan diteliti oleh pihak Kementerian dan seterusnya akan diangkat kepada Jemaah Menteri untuk keputusan dasar mengenai isu pengiktirafan sijil UEC.

Sekian, terima kasih.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI CHE ABDULLAH BIN MAT
NAWI [TUMPAT]**

TARIKH : 27 NOVEMBER 2019 (RABU)

SOALAN

Dato' Haji Che Abdullah bin Mat Nawi [Tumpat] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini keganasan rumah tangga yang dilaporkan setiap tahun sejak 2013 berdasarkan kategori agama dan kaum.

JAWAPAN

Tuan Yang di-Pertua,

Bagi menangani isu keganasan rumah tangga, Kementerian Pembangunan Wanita, Keluarga dan Masyarakat (KPWKM) mengambil tindakan di bawah Akta Keganasan Rumah Tangga 1994 [Akta 521]. Menerusi akta ini, Kerajaan memperuntukan perlindungan undang-undang dalam situasi keganasan rumah tangga dan perkara-perkara yang bersampingan dengannya. Tindakan segera akan dijalankan bersama agensi-agensi penguatkuasaan seperti Polis Diraja Malaysia (PDRM), mahkamah dan agensi yang berkaitan bagi memastikan segala bentuk keganasan rumah tangga dapat dibendung.

Jumlah kes warganegara yang dilaporkan dari tahun 2013 hingga 2018 adalah sebanyak **4,071** kes. Daripada jumlah tersebut, sebanyak **2,386** kes (58%) adalah kaum Melayu, **773** kes (19%) adalah kaum India, **486** kes (12%) adalah kaum Cina, **312** kes (8%) adalah kaum Peribumi Sabah, **81** kes (2%) adalah Peribumi Sarawak, **6** kes (0.2%) adalah Peribumi Semenanjung dan **27** kes (0.8%) adalah lain-lain kaum.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KE EMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 27 NOVEMBER 2019 (RABU)

SOALAN NO. 33

Minta **MENTERI PERTANIAN DAN INDUSTRI ASAS TANI** menyatakan apakah usaha pembangunan yang telah dilaksanakan atas tanah-tanah terbiar yang banyak di daerah Papar.

JAWAPAN

Yang di-Pertua,

1. Dalam usaha mengoptimumkan penggunaan tanah untuk tujuan pertanian, Kementerian Pertanian dan Industri Asas Tani telah melaksanakan:

- i. Projek Pemulihan Tanah Sawah Terbiar di Negeri Sabah; dan
- ii. Projek Tanah Terbiar.

Projek Pemulihan Tanah Sawah Terbiar di Negeri Sabah dan Projek Tanah Terbiar dilaksanakan oleh Jabatan Pertanian Negeri Sabah dengan jumlah peruntukkan sehingga tahun 2019 masing-masing RM10.42 juta dan RM10.749 juta.

2. Projek Pemulihan Tanah Sawah Terbiar di Negeri Sabah bermula pada tahun 2007 khusus bagi tanah sawah untuk tujuan penanaman padi. Insentif ditawarkan kepada usahawan dan pemilik tanah pada kadar maksimum RM5,000 – RM7,000 per hektar.

SOALAN NO : 27

Sehingga kini, seluas 690 hektar tanah sawah terbiar telah dipulihkan dengan 190 hektar adalah di daerah Papar. Kawasan di Papar yang terlibat adalah seperti berikut:

TAHUN	KAMPUNG	KELUASAN (HEKTAR)	PELAKSANA
2016	Kg. Lakut	40	Jabatan Pertanian Sabah
2018	Kg.Bunal, Bongawan	40	Pertubuhan Peladang Negeri Jentera Cawangan Papar
2019	Kg.Sabang, Bongawan	40	Syarikat Sunnata Agritec Sdn. Bh
	Kg. Navoung	30	Jabatan Pertanian Sabah
	Kg. Luagan, Bongawan	40	

3. Manakala bagi Projek Pembangunan Tanah Terbiar yang bermula pada tahun 2007 bertujuan untuk membangunkan tanah supaya produktif dan memberi pulangan kepada pengusaha di samping peningkatan dalam pengeluaran tanaman makanan. Insentif ditawarkan kepada usahawan dan pemilik tanah pada kadar maksimum RM20,000 per hektar secara *one-off*. Seramai 1,283 orang pengusaha telah menerima insentif yang disalurkan oleh Jabatan Pertanian Negeri Sabah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SRI ISMAIL SABRI BIN YAAKOB
(BERA)**

TARIKH : 27 NOVEMBER 2019

SOALAN :

Dato' Sri Ismail Sabri bin Yaakob [Bera] minta **MENTERI DALAM NEGERI** menyatakan berapakah jumlah kes tangkapan yang melibatkan penipuan kad pengenalan sehingga kini dan perincian berdasarkan kaum dan negara asal.

JAWAPAN

Tuan Yang Di-Pertua,

Untuk makluman Ahli Yang Berhormat, sebanyak 470 tangkapan telah dibuat ke atas individu yang menyalahgunakan dokumen pengenalan diri samada menggunakan kad pengenalan milik orang lain atau memiliki kad pengenalan palsu bagi tempoh dari tahun 2017 sehingga bulan September 2019.

Bagi menjawab pertanyaan Ahli Yang Berhormat juga, perincian tangkapan tersebut bagi tempoh yang dinyatakan mengikut pecahan negara asal individu yang ditangkap adalah seperti berikut:-

TAHUN 2017	
WARGANEGARA	JUMLAH TANGKAPAN
Filipina	183
Indonesia	57
India	3
Thailand	2
Malaysia	4
China	2
Rusia	1
Singapura	2
Algeria	1
Pakistan	1
JUMLAH	256

TAHUN 2018	
WARGANEGARA	JUMLAH TANGKAPAN
Filipina	63
Indonesia	47
Malaysia	11
China	6
Thailand	3
Myanmar	2
Pakistan	1
JUMLAH	133

TAHUN 2019 (Sehingga September 2019)	
WARGANEGARA	JUMLAH TANGKAPAN
Filipina	77
Indonesia	2
China	1
Pakistan	1
JUMLAH	81

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SRI HJ IKMAL HISHAM BIN ABDUL
AZIZ (TANAH MERAH)**

TARIKH : 27 NOVEMBER 2019

SOALAN

DATO' SRI IKMAL HISHAM BIN ABDUL AZIZ [TANAH MERAH] minta **MENTERI DALAM NEGERI** menyatakan sejak Januari hingga September tahun ini, berapa jumlah kes melibatkan Macau Scam dan jumlah kerugian yang dialami oleh mangsa.

JAWAPAN

Tuan Yang Di Pertua,

Berdasarkan statistik daripada Polis Diraja Malaysia (PDRM) bagi tahun 2019 iaitu dari bulan Januari hingga 31 Ogos 2019, sebanyak 1,612 kes *Macau Scam* telah dilaporkan dengan nilai kerugian yang direkodkan sebanyak RM 79,483,843.43.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TAN SRI ANNUAR B. MUSA (KETEREH)

TARIKH : 27 NOVEMBER 2019

SOALAN

TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **MENTERI DALAM NEGERI** menyatakan berapa jumlah permohonan status penduduk tetap yang telah diterima pada 2017, 2018 dan 2019 sehingga kini mengikut pecahan kaum.

JAWAPAN

Tuan Yang Di-Pertua,

Untuk makluman Ahli Yang Berhormat, berdasarkan rekod pangkalan data Jabatan Pendaftaran Negara (JPN) jumlah permohonan kali pertama Kad Pengenalan bertaraf Pemastautin Tetap (MyPR) adalah sebanyak 2,160 bagi tahun 2017, 2,127 bagi tahun 2018 dan 1,627 bagi tahun 2019 (Januari – September 2019).

Untuk makluman Ahli Yang Berhormat juga, status keturunan bagi pemegang MyPR ditentukan mengikut negara asal pemohon berdasarkan passport dan juga Permit Masuk yang dikeluarkan oleh Jabatan Imigresen Malaysia (JIM). Kategori negara asal pemohon MyPR yang tertinggi bagi tempoh ketiga-tiga tahun yang dinyatakan adalah dari Indonesia.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
[HULU LANGAT]**

TARIKH : 27 NOVEMBER 2019

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI DALAM NEGERI** menyatakan apakah kriteria Agensi Penguatkuasaan Maritim Malaysia dalam memilih dan membina pangkalan baharu kerana kedudukan pangkalan yang tidak strategik serta terlalu umum mendedahkan pergerakan serta operasi APMM kepada anasir asing yang ingin menjarah hasil laut negara.

JAWAPAN

Tuan Yang Di Pertua,

Kesemua Pangkalan Agensi Penguatkuasaan Maritim Malaysia (APMM) yang sedia ada adalah di tempatkan di kawasan yang strategik dan dipilih berdasarkan kriteria yang ditetapkan. Pada masa ini, APMM mempunyai sebanyak 12 pangkalan sendiri dan 18 bangunan pejabat di seluruh negara.

Di antara kriteria pemilihan lokasi untuk pangkalan dan bangunan pejabat milik APMM adalah seperti berikut:

1. Kedudukan geografi yang selamat dan terlindung dari angin monsun yang boleh memudaratkan aset laut dan bangunan pejabat;

SOALAN NO : 31

2. Kemudahan laluan keluar masuk aset APMM dengan kedalaman air yang sesuai tanpa menjejaskan operasi sewaktu air surut;
3. Lokasi yang terhampir dengan laut dan mempunyai kemudahan jeti bagi menempatkan kapal dan bot APMM;
4. Kawasan terhampir dengan *hotspot* yang sering berlaku kes jenayah di laut; dan
5. Mempunyai keluasan kawasan yang mencukupi untuk menampung vesel di Pusat Tahanan Vesel.

Isu sama ada sesuatu lokasi tersebut strategik atau tidak sebenarnya adalah bersifat subjektif kerana Pangkalan Aset APMM itu sendiri adalah statik dan akan diketahui umum walau dimana sahaja ditempatkan. Ini kerana APMM sememangnya mahu menunjukkan kepada umum sebagai “deterrent” dengan keberadaan aset-aset rondaan di laut bagi mencegah jenayah di laut serta pencerobohan oleh nelayan asing.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 27 NOVEMBER 2019 (RABU)

SOALAN

Minta **MENTERI PENDIDIKAN** menyatakan apakah justifikasi Kerajaan mahu menggabungkan Universiti Sultan Zainal Abidin (UniSZA) dan Universiti Malaysia Terengganu (UMT) yang pastinya akan membawa kepada pembangunan pendidikan negeri Terengganu.

JAWAPAN

Tuan Yang di-Pertua,

Berdasarkan kepada kebolehpayaan dan kepakaran kedua-dua universiti, Mesyuarat Jemaah Menteri pada 5 April 2019 telah mencadangkan supaya Universiti Malaysia Terengganu (UMT) dan Universiti Sultan Zainal Abidin (UniSZA) digabungkan. Sehubungan dengan itu, Kementerian Pendidikan Malaysia (KPM) telah menubuhkan satu Jawatankuasa Pemandu yang diketuai oleh Ketua Pengarah Pendidikan Tinggi (KPPT) untuk memastikan proses penggabungan ini dapat dilaksanakan dengan efisien dan efektif.

Melalui perbincangan awal pada 26 dan 27 September 2019, UMT dan UniSZA telah bersetuju untuk menggunakan peluang penggabungan ini bagi memperkasakan lagi kebitaraan bidang fokus kedua-dua buah universiti, mempertingkatkan kualiti perkhidmatan serta memberi lebih nilai tambah kepada mahasiswa, fakulti serta komuniti setempat.

Beberapa sesi libat urus telah diadakan bersama-sama pihak berkepentingan universiti iaitu Pengerusi LPU, pengurusan tertinggi, wakil-wakil staf akademik, staf pentadbiran dan sokongan, mahasiswa dan alumni. Kementerian juga telah mendapatkan maklumbalas daripada wakil-wakil agensi persekutuan seperti Jabatan Perkhidmatan Awam (JPA), Kementerian Kewangan (MOF), Jabatan Peguam Negara (AGC) dan Kementerian Hal Ehwal Ekonomi (MEA). Sesi libat urus bersama Gabungan Majlis Presiden Dan Setiausaha Kehormat Kesatuan Kakitangan Universiti/IPTA Malaysia (GAKUM) juga telah dilaksanakan.

Dapatan awal perbincangan dengan pihak berkepentingan telah memperlihatkan keupayaan dan potensi UMT dan UniSZA sebagai sebuah universiti baharu yang menjadi peneraju terulung dalam integrasi keilmuan Islam dan sains terutamanya dalam bidang Ilmu Peradaban Islam dan Sains Kelautan. Rasionalisasi penggabungan UMT-UniSZA ialah:

1. Melonjakkan pencapaian dan kecemerlangan akademik, penyelidikan dan pengantarabangsaan;
2. Melipat ganda kapasiti, keberhasilan dan impak sumber manusia, kepakaran dan fasiliti universiti;
3. Perluasan akses dan kemudahan, fasiliti, infrastruktur kepada para pelajar dan kakitangan. Perluasan akses dan kemudahan ini akan mempertingkatkan kualiti pembangunan pelajar dari segi akademik dan sahsiah; dan
4. Menjadi sebuah pusat rujukan kebitaraan di peringkat global dalam era merentas disiplin (*transdisciplinary*).

Justeru, penggabungan ini bakal memperkasakan hub pendidikan tinggi di negeri Terengganu serta memperkukuhkan kebitaraan bidang fokus sedia ada dan mengembangkan kebitaraan bidang fokus baharu dapat diwujudkan melalui aktiviti *transdisciplinary*. Kerajaan akan memastikan penggabungan ini tidak akan merugikan mana-mana pihak yang terlibat kerana ia dapat melonjakkan prestasi dan pencapaian universiti ke tahap yang lebih cemerlang di peringkat negara dan antarabangsa. Sesi libat urus bersama-sama pihak berkepentingan akan diteruskan bagi melicinkan proses penggabungan dalam tempoh yang ditetapkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : LISAN

**DARIPADA : YB DATO' ROSOL BIN WAHID
[HULU TERENGGANU]**

TARIKH : 27 NOVEMBER 2019

SOALAN

**YB DATO' ROSOL BIN WAHID [HULU TERENGGANU] minta
MENTERI DALAM NEGERI menyatakan :**

- a) Langkah-langkah Kementerian untuk menangani premis perjudian dalam talian yang semakin bertambah; dan,
- b) Berapa bilangan terkini rangkaian sindiket perjudian dalam talian yang masih aktif mengikut negeri.

JAWAPAN

Tuan Yang Di-pertua,

Bagi menjawab **soalan (a)**, Kementerian Dalam Negeri melalui Polis Diraja Malaysia (PDRM) mengambil perhatian yang serius terhadap isu perjudian yang berleluasa di negara ini termasuklah premis-premis perjudian dalam talian yang semakin bertambah. Dalam hal ini Ketua Polis Negara telah mengeluarkan arahan agar isu ini ditangani dengan segera dan berterusan.

Di antara langkah-langkah yang diambil dan dirancang oleh pihak polis termasuklah:

- a) mengadakan operasi dan serbuan secara berterusan termasuklah operasi bersepadu dengan agensi-agensi lain seperti Suruhanjaya Pencegahan Rasuah Malaysia (SPRM) serta Pihak Berkuasa Tempatan (PBT) untuk melumpuhkan kegiatan ini;
- b) mengambil tindakan ke atas pihak-pihak yang terlibat dalam kegiatan ini termasuklah penjaga premis dan penganjur kegiatan perjudian haram di bawah peruntukan undang-undang berkaitan judi sedia ada seperti Akta Rumah Judi Terbuka 1957 dan Akta Pertaruhan 1953. Selain itu, tindakan yang lebih keras juga akan diambil di bawah peruntukan undang-undang lain yang berkaitan iaitu Akta Pencegahan Jenayah 1959 (POCA) serta Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001;
- c) bekerjasama dengan syarikat-syarikat utiliti seperti Tenaga Nasional Berhad (TNB) dan syarikat bekalan air untuk tindakan pemotongan bekalan elektrik dan air ke atas premis yang sering digunakan bagi sindiket perjudian; dan

- d) menggubal serta menambahbaik undang-undang berkaitan judi sedia ada bagi memastikan undang-undang ini relevan dengan perubahan modus operandi sindiket perjudian ini terutamanya perjudian atas talian (*online*). Dalam hal ini, Kementerian Dalam Negeri juga telah turut dilibatkan di dalam kajian undang-undang berkaitan perjudian yang sedang dijalankan oleh Kementerian Kewangan Malaysia (MOF) untuk ditambah baik supaya sentiasa selaras dengan perkembangan semasa.

Bagi **soalan (b)** pula, pihak polis tidak mempunyai bilangan yang terperinci mengenai bilangan sindiket perjudian dalam talian yang masih aktif. Walau bagaimanapun, banyak sindiket perjudian ini telah berjaya dibanteras oleh pihak polis melalui tindakan penguatkuasaan yang berterusan oleh pihak berkuasa.

Namun pihak polis percaya masih terdapat sindiket judi dalam talian yang masih beroperasi secara sulit dan sukar dibanteras sepenuhnya. Hal ini antara lain disebabkan oleh pelbagai faktor seperti sindiket yang menjalankan kegiatan dengan berselindung di sebalik perniagaan-perniagaan lain contohnya kedai menjual telefon bimbit, kegiatan perjudian ini tidak melibatkan transaksi tunai; dan sindiket tidak beroperasi di Malaysia, sebaliknya pelayar (server) mereka berpangkalan di luar negara dan menggunakan protokol internet (IP) berbeza.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD.
KADIR [SETIU]**

TARIKH : 27 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan bilakah Kementerian akan mengeluarkan lesen sampan untuk nelayan pesisir pantai bagi memenuhi syarat bantuan agensi berkaitan iaitu sampan dan bot berlesen.

JAWAPAN

Yang di-Pertua,

1. Berdasarkan Kajian Taksiran Sumber Perikanan yang dijalankan oleh Jabatan Perikanan Malaysia (DOF), menunjukkan sumber perikanan telah berkurang kepada 15 peratus, iaitu 23,236 metrik tan daripada 150,710 metrik tan pada tahun 1970-an. Dalam usaha mengurangkan tekanan ke atas sumber perikanan terutamanya di kawasan pesisiran pantai, dasar pembekuan sementara ke atas semua permohonan baru lesen vesel zon A, B dan C telah dilaksanakan sejak tahun 1982.

2. Berdasarkan kepada perangkaan tahun 2018, jumlah vesel pesisir pantai zon A yang berdaftar di seluruh Malaysia adalah sebanyak 44,217 vesel. Daripada jumlah tersebut, sebanyak 2,162 vesel telah didaftarkan di Terengganu yang layak menerima bantuan dan insentif daripada pihak Kerajaan seperti berikut:

- Elaun Sara Hidup kepada pemilik vesel zon A dan awak-awak pada kadar RM250 sebulan mulai tahun 2020;
- Subsidi minyak petrol/diesel pada kadar RM1.65 sen seliter; dan
- Insentif Hasil Tangkapan Ikan pada kadar 10sen/kilogram.

3. Buat masa ini, dasar pembekuan lesen sampan masih lagi diteruskan. Namun, Kementerian sedang mengkaji kemungkinan untuk membuka semula permohonan lesen vesel zon A, yang mana kuota lesen vesel akan ditetapkan mengikut keupayaan daya tampungan sesebuah kawasan berbanding dengan sumber perikanan sedia ada. Selain itu, keutamaan akan diberikan kepada golongan belia bagi meningkatkan penglibatan mereka dalam bidang perikanan tangkapan serta penggunaan teknologi moden yang mesra sumber.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHAIRY JAMALUDDIN [REMBAU]

TARIKH : 27 NOVEMBER 2019 (RABU)

SOALAN NO. 35

Minta **MENTERI PENDIDIKAN** menyatakan sejauh manakah persediaan pihak Kementerian serta pihak sekolah terhadap silibus atau modul pelajaran berkaitan proses pilihan raya susulan pindaan had umur mengundi yang telah diturunkan kepada 18 tahun menjelang tahun persekolahan 2020.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited untuk memberi pengetahuan dan kesedaran kepada murid-murid sebagai persediaan menjadi pengundi apabila berumur 18 tahun. KPM juga telah memasukkan tajuk dan kandungan yang berkaitan dengan pilihan raya dalam kurikulum Sejarah yang sedang dilaksanakan pada masa kini. Tajuk ini diajar kepada murid secara berbeza-beza mengikut aras dan tahap keupayaan murid sama ada di peringkat rendah atau menengah. Melalui pelaksanaan Pendidikan Sivik, KPM juga memberi pendedahan kepada murid tentang literasi politik pengundi muda dengan membincangkan beberapa tajuk seperti Sistem Demokrasi Berparlimen, Pemupukan Jati Diri, Sistem Raja Berperlembagaan, Rukun Negara, Semangat Patriotik dan Cintai Malaysia.

Selain daripada pendedahan melalui kurikulum dan kokurikulum, murid juga akan terlibat dengan pemilihan ketua murid melalui model ala pilihanraya. KPM dengan kerjasama Suruhanjaya Pilihanraya (SPR) menjalankan sesi sindikasi dan simulasi pemulihan ketua murid melalui mekanisme pilihanraya sebagai projek rintis di sekolah. KPM berpandangan pelaksanaan model pilihanraya yang dikendalikan oleh SPR perlu disesuaikan dengan skop dan tujuan proses pemilihan ketua murid sekolah.

Dapatan program rintis tersebut dijadikan asas kepada penyediaan garis panduan pelaksanaan proses pilihanraya di sekolah bagi tujuan pemilihan ketua murid. Bagi tujuan tersebut, KPM akan mengeluarkan Surat Pekeliling Ikhtisas (SPI) baharu yang akan memberikan kebenaran kepada pihak sekolah memperluas penggunaan “speakers corner” sebagai platform calon pengawas murid mempromosi keupayaan diri dan membenarkan proses pemilihan ala pilihanraya di sekolah. SPI baharu ini akan membatalkan SPI Bil. 5 Tahun 2010 yang melarang pilihanraya diadakan di sekolah bagi tujuan pemilihan ketua murid.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 27 NOVEMBER 2019 (RABU)

SOALAN NO. 36

Minta **MENTERI PENDIDIKAN** menyatakan apakah jaminan Kementerian dalam memastikan tulisan Jawi dan Khat terus dimartabatkan dan dasar Kerajaan bagi penjagaan warisan ini tidak mudah disalah tafsir oleh pihak ketiga sepertimana yang dibuat oleh Persekutuan Persatuan Lembaga Pengurus Sekolah Cina Malaysia (Dong Zong) berhubung pelaksanaan pengenalan tulisan Khat dalam mata pelajaran Bahasa Melayu (BM), KSSR, Darjah 4 pada tahun 2020.

JAWAPAN

Tuan Yang di-Pertua,

Pengenalan tulisan Jawi dilaksanakan sebagai pengisian tambahan dalam aspek seni penulisan/ bahasa dan untuk memperkaya murid dengan pengetahuan mengenai seni, warisan dan sejarah bahasa Melayu. Pengisian ini dilaksanakan melalui pembelajaran di dalam buku teks Bahasa Melayu Tahap II. Tulisan Jawi dilaksanakan melalui semakan semula Kurikulum Standard Sekolah Rendah (KSSR) bagi murid Tahap II yang bermula dengan melibatkan Tahun 4 pada tahun 2020, Tahun 5 pada tahun 2021 dan Tahun 6 pada tahun 2022.

Untuk makluman Ahli Yang Berhormat, Mesyuarat Jemaah Menteri pada 14 Ogos 2019 memutuskan supaya pengenalan tulisan Jawi diteruskan bagi semua sekolah termasuk Sekolah Jenis Kebangsaan

(SJK) dengan syarat dilaksanakan jika dipersetujui oleh Persatuan Ibu Bapa dan Guru (PIBG) serta ibu bapa dan murid SJK berkenaan. Perkara ini selaras dengan Peraturan-Peraturan Pendidikan (Persatuan Ibu Bapa Guru) 1998, iaitu tujuan persatuan adalah untuk mengadakan sesuatu forum dan perkhidmatan bagi kebajikan dan kemajuan murid-murid dalam sekolah. PIBG juga memberi peluang kepada ibu bapa dan guru dalam sekolah berunding untuk memperbaiki taraf pendidikan anak-anak mereka.

KPM juga telah melaksanakan pelbagai langkah bagi memastikan tulisan jawi sebagai sejarah warisan negara terus diperkasakan dalam kalangan murid berbilang bangsa. Antara langkah tersebut adalah seperti berikut iaitu:

1. memperkenalkan aspek seni bahasa dalam kurikulum mata pelajaran Bahasa Melayu (KSSR) Tahap II iaitu Tahun 4 bermula tahun 2020;
2. menyelaraskan sistem ejaan jawi melalui pengemaskinian Pedoman Umum Ejaan Jawi Bahasa Melayu yang lengkap dengan daftar kata sebagai rujukan;
3. menyediakan ruang penulisan tulisan Jawi dalam majalah terbitan Dewan Bahasa dan Pustaka (DBP) seperti Tamadun Islam, Tunas Cipta, Dewan Pelajar dan lain-lain yang boleh disebarkan kepada semua murid pelbagai kaum;
4. menghasilkan bahan ilmiah dalam tulisan Jawi seperti Pedoman Transliterasi Huruf Arab ke Huruf Rumi, Perkembangan Tulisan Jawi dalam Masyarakat Melayu, Sejarah Perkembangan Tulisan Jawi dan Panduan Menulis dan Mengeja Jawi;
5. menjalankan kajian berteraskan tulisan Jawi dalam manuskrip lama dari sudut kebahasaan dan kesusasteraan untuk dimanfaatkan oleh masyarakat;

6. melantik Munsyi Dewan (Jawi) dalam kalangan penggiat tulisan Jawi. Sehingga kini, terdapat seramai 51 orang telah dilantik sebagai Munsyi Dewan (Jawi);
7. melaksanakan program dan klinik Jawi seperti Kursus Pembinaan Munsyi Dewan (Jawi) dan Kursus Pengkaedahan Jawi Guru KAFA;
8. menyediakan khidmat penyemakan dan pengesahan ejaan tulisan Jawi;
9. menjalinkan kerjasama dengan Majlis Dakwah Negara (MDN), dengan menubuhkan Panel Memperkasa Tulisan Jawi yang bertujuan menyatukan institusi, pertubuhan dan pihak yang berusaha memartabatkan penggunaan tulisan Jawi di negara ini;
10. memperkenalkan pengajaran dan pembelajaran tulisan jawi dalam kurikulum pendidikan Islam sejak pelaksanaan KBSR pada tahun 1982 dan diteruskan lagi dalam pelaksanaan KSSR semakan; dan
11. memperkenalkan Kelab Jawi dan Khat di sekolah sejak tahun 2008 melalui Surat pekeliling Ikhtisas Bilangan 1 Tahun 2008 berkaitan Penubuhan Persatuan Bahasa Arab dan Kelab Jawi dan Khat di Sekolah Rendah yang Melaksanakan Program j-QAF.

Bagi memastikan tulisan jawi terus dimartabatkan, Kementerian Pendidikan Malaysia (KPM) akan meneruskan asas pengenalan tulisan jawi di sekolah rendah dalam aspek seni bahasa kurikulum Bahasa Melayu Tahap II. Sesi libat urus bersama PIBG dipergiatkan agar segala kekeliruan akan dapat diatasi.

Sekian, terima kasih.